


1790

7990.2

V. 4




EAST ASIAN LIBRARY
CHINESE COLLECTION

APR 8

1942

哥倫比亞大學
中文圖書館章





卷第十七 保國

一 內其國

一 春秋之義有內外之分。公羊傳曰：春秋內其國而外諸夏。內諸夏而外夷狄。王者欲一手天下，曷為以外內之辭言之？言自近者始也。成公十五年：蓋春秋之分義為三世。亂世及升平世不得已而有內外之分。若太平世則遠本近大小若一無分內外也。

所以別內外者，從義以正我言之。則先正內而後正外。孔子所謂躬自厚而薄責於人也。論語第十五：公羊傳曰：春秋錄內而略外，於外大惡書，小惡不書；於內大惡諱，小惡書。何注云：於內大惡諱，於外大惡書者，明王者起當先自正，內無大惡，然後乃可治諸夏大惡。因見

臣子之義當先為君父諱大惡也。內小惡書，外小惡不書者，內有小惡適可治諸夏大惡，未可治諸夏小惡，明當先自正然後正人。小惡不諱者，罪薄恥輕。隱公十年，此皆春秋詳內畧外之故也。蓋春秋以內為天下法，凡事皆先自克責也。公羊傳注襄公九年。

從仁以愛人言之，則先愛內而後愛外。孔子曰：立愛自親始。禮記祭義有子曰：孝弟也者，其為仁之本。論語第一。孟子曰：親親而仁，仁民而愛物。第十三。皆言用愛之先近而後遠也。家與鄰並立而先愛者，吾家。國與鄰並立而先愛者，吾國。論語記柳下惠不去父母之邦。第十八。孟子謂孔子之去齊，接淅而行，去魯，曰：遲遲吾行也。去父母國之道也。第士然則孔子之愛魯，其必有以異於愛齊矣。此春秋所

以內其國而外諸夏也。即愛國之義也。

二 春秋之義。內不言戰。言戰則為敗。蓋親愛父母之邦。不諱敵而諱敗。惜其毀折而欲保全之也。此孔子愛國之義也。穀梁傳桓公十年成公元年。

三 春秋之義。不欲使本國有敵難。莊公十九年。春秋曰。冬。齊人宋人陳人伐我西鄙。穀梁傳曰。其曰鄙。遠之也。不以難通我國也。孫覺曰。春秋外師之至魯。雖入其郭。亦皆曰鄙。侵伐他國。但曰某而已。不曰某鄙。魯必曰鄙者。蓋我國之君。治國之道。素脩禦敵之道。素備。彼之來寇者。乃適吾閒隙。犯吾邊鄙耳。故春秋之法。內言戰而不言敗。言侵言伐。不言其至於國都。所以親之尊之而備責之也。哀八年十

一年再言伐我而不言其鄙者春秋之終而聖人之微旨也

四 太平之世化被無外無外之非外矣內哀公八年春秋曰吳伐我十一年又曰春齊國書帥師伐我春秋繁露曰當此之時魯無鄙疆諸侯之伐哀者皆言我第三十四蓋春秋託王於魯言至是王化已普及天下無鄙疆之可言也此所謂文致太平也

二 疆內

一 春秋有疆內之義言國君當疆折衝當遠不可使敵得至近邑也莊公十年春秋曰夏六月齊師宋師次于郎公敗宋師于乘丘其言次于郎何伐也伐則其言次何蓋二國纔止次于郎未成於伐而魯即能敗宋師致齊師與伐而不與戰獨自罷去故不言伐而言次

也。明國君當彊，折衝當遠。魯被敵深犯，至於近邑，微弱已極，賴能速勝之耳。又明臣民當將順其君，速勝之美，而匡救其微弱之惡，此皆所以彊內也。即孔子彊國之義也。說苑曰：夫兵不可玩，玩則無威，兵不可廢，則召寇。昔夫差好戰而忘亡，徐偃王無武亦滅，故明王之制國也，上不玩兵，下不廢武。易曰：存不忘亡，是以身安而國家可保也。魯敗乾時，浚洙微弱之甚，至二國師次近邑，而能勝之，故書以彊內。（說苑卷十五）

二 凡兵近都城，則舉國無大小，當戮力拒之。桓公十年，春秋曰：冬十有二月丙午，齊侯、衛侯、鄭伯來戰于郎。郎者何？魯之近邑也。惡乎近？近國都也。其言來戰于郎，何？明舉國無大小，當戮力拒敵也。故魯

不復出主名。即謂全國之人無小無大皆與有責矣。此孔子保國之義也。

三 凡謀人之國者當令國安而無侵伐。故曲禮曰。四郊多壘。此卿大夫之辱也。

四 凡城下之戰雖勝猶耻。故拒敵宜豫。桓公十三年春秋曰。春二月公會紀侯鄭伯己巳及齊人侯宋公衛侯燕人戰。齊師宋師衛師燕師敗績。公羊傳曰。何以不地。近也。惡乎近。近乎圍。郎亦近矣。郎何以地。郎猶可以地也。按此即所謂龍門之戰。龍門者魯之郭門也。郎雖近都城。尚可言其處。今則國君親戰。聯軍攻城。已近乎圍矣。情勢尤危急。故耻之而不地也。是戰也得紀侯鄭伯然後能結戰。日以勝。

孔子不掩人之功。不蔽人之善。故於主名之後。乃書曰也。

五 凡國都被圍。為國之大恥。哀公八年春。春秋曰。吳伐我。何注曰。不言鄙者。起圍魯也。不言圍者。諱使若伐而去。蓋伐猶愈於圍也。

三 守備

一 凡春秋之志城者。皆譏之。隱公七年。穀梁傳曰。城為保民為之也。民眾城小。則益城。益城無極。凡城之志。皆譏也。蓋春秋之義。以為民保於城。城保於德。左傳哀公七年。若專以益城為事。是不務德而徒恃城為衛矣。故譏之也。且孔子之制。建國立城。均有定所。高下大小。存乎王制。若民眾城小。則益城。是無極而踰制矣。此又一義也。

二 凡保民守國。則修城之事。亦屬不得已。惟當以時稍稍補完之。

若任令大崩弛壞敗然後發眾城之猥苦百姓空虛國家則春秋言城明其功重與始作城無異隱公七年書夏城中上是也中上者魯之邑也此重用民力之義也

三 凡修城之事惟令冬尚可行之不違農時之義也穀梁傳莊公二

十九年

四 凡修城不當帥師文公十二年冬十有二月春秋曰季孫行父帥師城諸及邇何注曰書帥師者刺魯微弱邑久不修不敢徒行興師厲眾然後敢城之言及者別君邑臣邑也

五 凡國君微弱不能自城國都危社稷宗廟則當坐襄公二十九年諸侯城杞而春秋貶杞伯為杞子書曰杞子來盟是也春秋善諸

侯城杞復貶杞子者諸侯自閔而城之非杞能以善道致諸侯也又昭公六年春秋曰春王正月杞伯益姑卒夫襄公二十三年杞伯匄卒春秋已書其日矣今乃不書益姑之卒日者何注曰行微弱故略之上城杞已貶復卒略之者入所見世責小國詳始錄內行也何注所謂內行當別有所指在不能自城之外惟既云行微弱故略之則其所謂內行亦微弱而已蓋內行微弱者其凡而不能自城者其目也此以見人君之貴自強而惡微弱也

六 凡國家當有守禦之備故易曰王公設險以守其國若以無備亡國則國雖亡而咎由自取仍不得言滅僖公三年春秋曰徐人取郕言其易若取邑也鹽蓋鐵論曰關梁者邦國之固而山川社稷之寶

也。徐人取舒。春秋謂之取惡。其無備得物之易也。故君子為國。必有不可犯之難。易曰。重門擊柝。以待暴客。言備之素修也。第五十

成公八年。晉景公使申公巫臣如吳。假道于莒。與渠丘公立於池上。曰。城已惡。莒子曰。辟陋在夷。其孰以我為虞。對曰。夫狡焉思啟封疆。以利社稷者。何國蔑有。唯然故多大國矣。唯或思或縱也。勇夫重閉。況國乎。明年冬十一月。楚子重伐莒。圍渠丘。渠丘城惡。眾潰奔莒。戊申。月之六日也。楚入渠丘。楚師圍莒。莒城亦惡。庚申。月之十八日也。莒潰。楚遂入鄆。莒無備故也。君子曰。恃陋而不備。罪之大者也。備豫不虞。善之大者也。莒恃其陋而不脩城郭。決辰之間。而楚克其三都。無備也。夫左傳

七 凡國固不可以無備。然守備之事當務其遠者大者。其守備之範圍愈遠愈大。則其勢愈強。其守備之範圍愈近愈小。則其勢且不免於亡。守在四夷。為大一統之盛事。今且勿論。若列國並立。則交鄰有道。敵患潛消。此所謂守在四鄰者也。上也。苟威不及遠。聊固吾圉。則所謂守在四竟者也。次也。若僅以國都為守。則其去亡國不遠矣。孔子三十三年。即昭公二十三年。楚囊瓦為令尹。城郢。沈尹成論之曰。子常必亡郢。苟不能衛城。無益也。古者天子守在四夷。天子卑。守在諸侯。諸侯守在四鄰。諸侯卑。守在四竟。慎其四竟。結其四援。民狎其野。三務成功。民無內憂。而又無外懼。國焉用城。今吳是懼而城於郢。守已小矣。卑之不獲。能無亡乎。昔梁伯溝其公宮而民潰。民弃其上。不亡何

待夫正其疆場脩其土田險其走集親其民人明其伍候信其鄰國
慎其官守守其交禮不僭不貪不懦不耆完其守備以待不虞又何
畏矣詩曰無念爾祖聿脩厥德無亦監乎若敖蚡冒至於文武土不
過同慎其四竟猶不城郢今土數圻而郢是城不亦難乎左傳

四 禦敵

一 凡却難當早宜敵未來而先銷弭之定公九年春秋曰秋齊侯
衛侯次于五氏何注曰欲伐魯也善魯能却難早故書次而去

春秋繁露曰兵已加焉乃往救之則弗美未至豫備之則美之善其
救害之先也夫救患而先之則害無由起而天下無害矣然則觀物
之動而先覺其萌絕亂塞害於將然而未形之時春秋之志也第二

十九

二 凡用兵之節。敵來則禦而追之。去則止。不宜遠勞百姓。過復取勝。僖公二十六年。春秋曰。齊人侵我西鄙。公追齊師至鵠弗及。蓋大僖公能却強齊之兵也。言齊人畏公士卒精猛。引師而去。深遠不可得及也。舉地者。善公得用兵之節。不勞民以爭勝也。

三 凡用兵之道。於國之存亡。強弱無大關係者。當量力而為進退。以保重民命為主。襄公十五年。春秋曰。夏。齊侯伐我北鄙。圖成。公救成。至遇。何注曰。兵不敵。不敢進也。不刺之者。量力不責重民也。蓋春秋以重民為第一要義。襄公知力不能敵。不忍戰殺其民。至遇即止而不進。得用兵之宜。故不責之也。

五 國恥

一 春秋之義立國當自彊而不當畏人。畏人則可恥而又可惡。莊公九年春秋曰冬浚洙。公羊傳曰洙者何水也。浚之者何深之也。曷為深之。畏齊也。蓋以魯之微弱為可恥也。文公十年春秋曰楚子蔡侯次于屈貉。何注曰魯恐故書刺微弱也。僖公三十一年冬春秋曰狄圍衛。十有二月衛遷于帝丘。何注云月者惡大國遷至小國。城郭堅固。人眾彊。遷徙畏人。故惡之也。蓋僖公二年諸侯為衛城。楚丘本甚堅固。今衛畏狄。由楚丘遷于帝丘。孔子以其有堅固之城郭。強盛之人民。而不能自彊。反遷徙畏人。故惡之也。孟子曰未聞以千里畏人者也。第二又曰不行王政云爾。苟行王政四海之內皆舉首而望。

之欲以為君。齊楚雖大，何畏焉？第六蓋由孔教之道，祇患不能自彊，斷無畏人之理也。

二 凡大國為示威之運動，以輕侮本國者可恥。莊公三十一年春，秋曰：六月，齊侯來獻戎捷。公羊傳曰：齊大國也，曷為親來獻戎捷？威我也。其威我奈何？旗獲而過我也。所謂張旗陳獲，驕侯諸也。春秋繁露第八不書威魯者，恥不能為齊所忌，難見輕侮也。實威我而言獻捷，尊內文也。

三 凡敗軍之失地，當舉國知恥。檀弓曰：國亡大縣邑，公卿大夫士皆厭冠，哭於大廟三日。君不舉，或曰：君舉而哭於后土。厭冠，喪冠也。失地為先祖所哀，故哭於廟也。社主土，故哭於后土也。舉謂舉樂也。

四 凡軍敗以喪禮處之。露其兵以示當報。檀弓曰：軍有憂則素服，哭於庫門之外。赴車不載橐韜。赴車者，從軍赴國告敗之車也。謂之赴者，以告喪之辭言之也。露載其甲及弓，不載橐以載甲，不載韜以載弓，示當報也。

五 凡危亡將至，則不暇殺恥，當以救危為急。昭公二十八年，春秋曰：春王三月，公如晉，次于乾侯。何注曰：乾侯，晉地名。月者，閔公為強臣所逐，外如晉不見答，次于乾侯，不諱者，憂危不暇殺恥。又二十九年，春秋曰：冬十月，運潰。何注曰：昭公居之，故從國言潰。不諱者，責臣子當憂而納之，殺恥不如救危也。

六 凡國重君輕，苟有國危之憂，自不暇為君恥之諱。桓公十八年，

齊誘殺桓公。春秋固不書齊誘殺諱之。然猶書曰夏四月丙子公薨于齊。何注曰地者在外為大國所殺於國尤危。國重故不暇隱也。

六 救國

一 凡君子避內難而不避外難。國有內亂力能討之則討之。不討則不免於罪。力不能討則潔身自守。不與亂事何也。若鄰國為寇則

是外患。雖力不足有死而已。不可避也。公羊傳莊公二十七年禮記

雜記

二 凡救國之危則凡屬國民皆有其責。哀公十一年田常欲作亂於齊。憚高國鮑晏故移其兵欲以伐魯。孔子聞之謂門弟子曰諸侯有相伐者止嘗恥之。夫魯父母之國也。止墓在焉。今齊將伐之子無

意一出邪。吳越春秋子路請出。孔子止之。子張子石請行。孔子弗許。子貢請行。孔子許之。子貢遂至齊。說田常曰。憂在內者攻強。憂在外者攻弱。不如伐吳。然齊兵業已加魯。不^能去而之吳。乃請田常案兵無伐。且請往使吳王。令之救魯而伐齊。齊因以兵迎之。吳畏越乘其後。復東見越王。令出兵以從吳。又之晉。謂晉君曰。吳與齊戰而勝。必以兵臨晉。宜修兵休卒以待之。乃反魯。是年吳王果與齊人戰于艾陵。大破齊師。獲七將軍之兵而不歸。果以兵臨晉。哀公十三年。與晉人相遇黃池之上。吳晉爭彊。晉人擊之。大敗吳師。越王聞之。涉江襲吳。遂霸諸侯。故子貢一出。存魯。亂齊。破吳。彊晉而霸越。此子貢救魯之成績也。更記第六十七。夫子貢之存魯。孔子之志也。至其變動齊吳。

晉越之形勢則非孔子之志也。然子貢亦非有惡於齊與吳而亂之破之也。非有愛於晉與越而彊之霸之也。其志不過在存魯而已。以存魯為主。而其餘四國之利害皆不能兼顧。此救國者無可如何之事勢也。且亦四國之自取也。若使吳勝齊之後。即罷兵歸國。又何至是哉。且夫孔子及其弟子。不過匹夫耳。然國危即救。則救國者豈有分於貴賤乎。且子張陳人。子石楚人。子貢衛人。皆非魯人。然以留學於魯既久。即愛魯而願救之。斯亦歸化之民所當取法也。若夫土著之民。對於父母之國。墳墓所處。其救國之責任。益無可諉避矣。夫孔子以聚徒講學為事者也。然一聞國危。即命二三子出而救國。蓋既生亂世。既有國界。則國民之大事業。莫大於救國。此孔教之大義也。

韓詩外傳曰。荆伐陳。陳西門壞。因其降民使修之。孔子過而不式。子貢執轡而問曰。禮過三人則下。二人則式。今陳之修門者眾矣。夫子不為式。何也。孔子曰。國亡而弗知。不智也。知而不爭。非忠也。亡而不死。非勇也。修門者雖眾。不能行一於此。吾故弗式也。由此觀之。亡國之民。誠為孔子所賤惡矣。夫既為一國之民。當知國之事。豈可以亡國之大事而不知乎。孔子雖重禮讓。然一語及救國。則以爭為主。蓋國之存亡。關係極大。此而不爭。誠不可謂忠也。盡忠於國。爭以救國為事。而不許他人之亡我國家。此孔子忠國之義也。若雖爭之而不能存之。則致命遂志。以一死報國。此則救國者最後之事矣。孔子曰。志士不忘在溝壑。勇士不忘喪其元。孔子者。誠天下之大勇也。豈不

深惡乎國亡而不死者哉。夫陳之降民而至於修門則亦卑賤之庶民耳。乃孔子猶責以知亡之智。爭亡之忠。死節之勇。豈非顧炎武所謂天下興亡匹夫有責者耶。嗚呼。此孔教之所以切於實用也。

三 凡國與家相較則愛國先於愛家。哀公三年公羊傳曰。不以家事辭王事。以王事辭家事。是上之行乎下也。此不得以家事廢國事之義也。四牡之詩曰。王事靡盬。不遑將父。又曰。王事靡盬。不遑將母。亦此義也。夫無私恩非孝子也。無公義非忠臣也。君子不以私害公。然亦不可以無情。故四牡之詩。勤苦王事。念將父母。懷歸傷悲。忠孝之至也。思歸而不歸。此孔教所以為情義兼盡也。淺識者或謬謂孔教偏於家族主義。而缺乏國家思想。此真不知經義者也。

四 凡以身死君自是正義。若滅家以為君本非事祖傳重之義。然而於孔子之王法當貴。以活君為重也。至舍家救國。重於活君。更義所宜然。法所當贊矣。昔魯孝公幼。君幼則宜有養者。臧氏之母養公者也。養公者必以其子入養。不離人母子。因以娛公也。臧氏之母聞有賊入宮。將求公而弑之。乃以其子易公。抱公以逃。賊至。湊公寢而弑之。則其子也。而公不死矣。何休論之曰。以身死公則可以其子易公。非事夫之義。然而於王法當賞。以活公為重也。公羊傳昭公三十一年。此可見孔教之權衡於國家輕重之間矣。

五 凡救國之滅。雖不為父隱。亦得為善。夫孔子之道。父為子隱。子為父隱。所以全父子之親也。論語第十三。然若至於國家滅亡。則大

義所在。雖子亦有不宣為父隱者也矣。昔鄆子將廢其世子巫而立外孫立異姓為後。實與國滅無異。故巫往讞乎晉以求救。春秋善之。於襄公五年夏書曰。叔孫豹鄆世子巫如晉。巫揚父之惡而得為善者。救國之滅則可也。然六年秋又書曰。莒人滅鄆。則巫固無救於國之滅矣。然而春秋猶善之者。雖不能救。猶有言之之功也。公羊傳注疏嗟乎。世之不仁之徒。坐視宗國之亡而莫之救。或明知他人滅國之陰謀。而隱忍不舉發。或又以為雖舉發之而無益於事。遂相率而不言。其罪皆不可勝誅矣。夫親而至於父親子尊而至於國君。可謂極矣。然而救國之滅。則君父之惡亦可以揚。然則尚有何者足為吾愛國之累也哉。而乃隱忍不言乎。雖言之無效。至於國終不救。而春

秋猶許其有救國之功。孔子之勸勉善人，可謂至矣。世之有國以庇其身者，其亦重念孔教救國之義也耶。

七 報怨

春秋之義，不正人之以惡報惡。穀梁傳僖公二十三年，故有犯而不校之義。論語第八，然止於不校，則已可矣。若忘怨而親與會好，則不獨無恥，且致可危。隱公六年正月，鄭人來戰于狐壤，隱公獲焉。至十年，春秋書曰：春王二月，公會齊侯、鄭伯于中丘。何注曰：月者，隱前為鄭所獲，今始與相見，故危錄內明君子當犯而不校也。蓋孔教之義，以直報怨。論語第十四，固非以怨報怨，亦非頑鈍無恥而冒昧以蹈危機也。

凡報復之道論義理固合於公理論利害亦合於公利故孔子曰報者天下之利也又曰以德報德則民有所勸以怨報怨則民有所懲詩曰無言不讎無德不報又曰以德報怨則寬身之仁也以怨報德則刑戮之民也又曰無欲而好仁者無畏而惡不仁者天下一人而已矣是故君子議道自己而置法以民禮記表記知置法之義乃可與論報復之道矣蓋無欲而好仁者鮮故以德報德以勸之無畏而惡不仁者鮮故以怨報怨以懲之所報復者有限而勸懲者無數故曰報者天下之利也若夫以德報怨則每出於矯偽之情勉強之勢即不然亦偏厚於仁而不可為法以怨報德則忘恩負義固合受刑戮而亦非人情之常二者皆例外也論語云或曰以德報怨何如子

曰何以報德以直報怨以德報德第十四此言最簡約而詳盡矣是故雖君子之自處亦不以以德報怨為然也以直報怨者祇計義理不計感情義之必當報怨者則報之義之必不當報怨者則不報之義之可報可不報者則亦不報之唯義所在無一毫私意於其間故謂之直也若雜以私意雖非不當於理亦不過尋常以怨報怨之事非孔子之所謂直也至於以德報怨不獨過厚於怨且反致薄待於德既非人情之公亦非天理之平雖一己行之尚非中道更安足以為世法乎然以德報德者雖於私情加厚亦當以公義為限制非以私害公之謂也

夫人之相與以怨報怨雖不及以直報怨之至公無私尚為尋常報

復之道未為不合也。若國與國相爭，而又以怨報怨，則兵禍安有窮期？其民命之死於報復之戰者，將不可紀極矣。故春秋不正人之以惡報惡，而立犯而不校之義，所以息兵禍也。此私人與國際之別也。穀梁傳曰：禮人而不答，則反其敬；愛而不親，則反其仁；治而不治，則反其知。古者被甲嬰冑，非以興國也，則以征無道也。豈曰以報其恥哉？僖公二十二年，此春秋不許報怨之義也。

凡報怨無已之戰，春秋惡之甚，或謂之夷狄，或不別曲直而以為兩曲，或貶稱人而微之，或稱師以愍其眾而惡其將。孔子前七十六年，春秋以秦千里襲鄭，謂之夷狄。晉要秦師于殽而擊敗之，是為秦晉結怨之始。時秦繆公與晉襄公時也。孔子前七十四年，春秋曰：春王

二月甲子晉侯及秦師戰于彭衙秦師敗績稱秦師者愍其眾惡其將也。又曰冬晉人宋人陳人鄭人伐秦稱人者惡其兵連禍結無已也。故大夫而稱人前七十三年春秋曰秦人伐晉惡秦也。故秦君而稱人前七十二年春秋曰晉侯伐秦前七十年晉襄公卒前六十九年夏四月春秋曰戊子晉人及秦人戰于令狐晉先昧以師奔秦前六十六年春秋曰夏秦伐晉謂之秦者起令狐之戰敵均不敗晉先昧以師奔秦可以足矣而猶不知止故夷狄之前六十四年春秋曰冬十有二月戊午晉人秦人戰于河曲公羊傳曰此偏戰也何以不言師敗績也敵也曷為以水地河曲疏矣河千里而一曲也何注曰河曲疏以据地明故可以曲地因以起二國之君數興兵相伐戰無

已時故不言及不別曲直而地以河曲明兩曲也前五十八年秦繆公卒前五十六年春秋曰秦師伐晉何注曰秦稱師者閔其眾惡其將本秦之忿起殽之戰今襄公繆公已死可以止矣而復伐晉惡其構怨結禍無已計自殽之戰至此共二十一年秦晉交戰者九而春秋大抵不直秦蓋秦為禍首又報復不已故重責之也

八 復讎

凡國君以國為體先君之恥猶今君之恥今君之恥猶先君之恥故雖百世之遠猶可以復讎讎者無時焉可與通通則為大譏不獨國君不可與讎通乃至全國臣民亦皆當復讎義不可與讎人相見蓋國與家不同家不可以報遠讎除父母兄弟為一體之親外並無復

讎之義。若國則世世相承。無絕滅之義。雖萬世如故。自開國之君以下。皆為一體。今君與先君為一體。今之臣民亦與今君及先君為一體。蓋國非獨國。君之國。君故君以國為一體。民亦以國為一體。君之讎即國之讎。國之讎即君之讎。君國之讎猶父之讎。弗可與共戴天也。春秋之義。臣不討賊。非臣也。子不復讎。非子也。君國之讎。人人所共。故齊襄公殺魯桓公。而何休曰。至於魯人。皆當復讎。義不可以見齊侯。又乾時之戰。復讎者在下。此皆臣民當為先君復讎之義也。夫乾時之戰。齊襄已死。所與戰者齊桓耳。又因復讎者在下而不言公。是以臣民為復讎之主體也。然而春秋榮之。是國讎比父讎尤重矣。何則。父讎限於殺者之身。而國讎乃在所讎之國。人命有窮期。而國家長

在也。又為子孫者。對於父讎。親盡則義絕。而為國民者。對於國讎。親無盡而義無絕。不復讎則怨不當釋也。明乎此。而孔教忠君愛國之義。可以見矣。昔孔子四百五十一年。漢武帝援春秋復讎之義。大伐匈奴。漢武誠不愧為中國之君哉。漢書第九十四又孔子一千七百四十九年。朱子曰。有天下者。承萬世無疆之統。則亦有萬世必復之報讎。此皆明乎以國為體之義也。

凡讎與怨不同。怨者小忿。不當以怨報怨。犯而不校可也。若讎則大義所在。不復讎。不足以為人。也。忠臣孝子。所以不能已。以恩義不可奪也。百虎通

凡義當受誅者。不當復讎。恐報復無已。往來不止也。定公四年。公羊

傳曰父不受誅子復讎可也父受誅子復讎推刃之道也復讎不除害斯義也通於國家矣

凡復讎者當為義而不當為利兵以義舉不可貪取其地也即使既滅其國亦但當遷徙去之不當取而有之如齊襄公滅紀當上之天子以諸侯不得盜有土地也周天子若以為紀尚當存別擇紀之賢者以奉其後而不取犯罪者之子孫則庶乎其可矣莊公四年夏春秋曰紀侯大去其國明復讎者不當取人國而有之也又曰六月乙丑齊侯葬紀伯姬公羊傳曰此復讎也曷為葬之滅其可滅葬其可葬此其為可葬奈何復讎者非將殺之逐之也以為雖遇紀侯之殯亦將葬之也由此觀之春秋所謂復讎固非動於貪利亦非動於感

情特行乎公義之不得不然者耳。非將殺之逐之。此所以為義兵也。雖然復讎非太平世之世法也。是故公羊傳雖賢齊襄公復九世之讎。而謂有明天子則襄公不得為若行。言太平世之不得復讎也。太平世何以不得復讎。蓋太平世則有明天子。王法森嚴。而可讎之人必受誅。可讎之國必被滅。既無可讎之人。無可讎之國。又安從而復讎。若有可讎之人。可讎之國。使復讎者不可以見讎而不復。則是無明天子而為亂世矣。既為亂世。則國之宿讎當然可復。故曰上無天子。下無方伯。緣恩疾者可也。蓋國讎以國為體。不能報之於當時。而報之於後世。固不得謂之遷怒也。凡復讎之戰。是為義戰。雖敗猶榮。昔齊襄公將復讎乎紀。命卜曰。師

喪分焉。寡人死之，不為不吉也。蓋復讎以死敗為榮也。又莊公九年，
春秋曰：八月庚申及齊師戰于乾時，我師敗績。公羊傳曰：內不言敗，
此其言敗何？伐敗也。曷為伐敗？復讎也。蓋復讎雖期其有成，然必竭
其智力，出萬死，不顧一生之計，置成敗利鈍於度外，方為復讎正理
也。苟復私讎者，以死敗為榮，則不義而殺人者懼矣。苟復國讎者，以
死敗為榮，則不義而兼并者懼矣。此固所以伸痛憤之人情，亦所以
維衰亂之世道也。

吾今敢正告天下曰：孔教復讎之大義，深入於全國之人心者數千
年。中國人固甚愛平和，然不論何國，苟有為無道於中國，使中國不
得行復讎之義者，則雖至萬世之遠，中國人固不能一日忘也。人人

懷必死之志以待之而已矣。

九 死義

一 春秋之義。君死于位曰滅。雖國不滅亦以滅言。蓋死位之善辭也。凡死戰者皆當加禮也。生得曰獲。被獲者當絕也。大夫不世。故生死皆曰獲。所以別君臣也。其被生獲者亦當絕也。公羊傳昭公二十三年。君獲不言師敗績。君重於師也。僖公十五年。大夫獲必書師敗績。師與大夫敵也。宣公二年。

二 春秋之法。國滅君死之正也。凡言滅者。亡國之善辭也。上下之同力者也。故遇國家滅亡之時。必須臣子與君戮力一心共死其難。若是者。其國雖亡而當存。有王者起。自當興滅國也。僖公五年。襄公

六年

凡國君死義者春秋賢之。莊公四年齊襄公滅之。紀侯率一國之眾以衛九世之主。襄公逐之不去。求之弗予。上下同心而俱死之。春秋賢其死義且得眾心也。故為之諱滅。書曰紀侯大去其國。春秋繁露第四

禮運曰國有患君死社稷謂之義。大夫死宗廟謂之辯。辯猶正也。君守禮社稷臣衛君宗廟者故皆以死為義也。患謂見圍入時也。孟子告滕文公曰鑿斯池也築斯城也與民守之效死而民弗去。又曰世守也非身之所能為也效死勿去謂土地乃先人之物世世守之非己身所得專為至死不可去也此正義也。然孟子又告以太王

之去邠居岐。豈國君亦有去國之義乎。曰非也。太王去邠居岐。是遷國而非滅國。宗社尚存。舊都亡而新都仍在。故不得已而權時之宜。以為之也。若春秋時。則國既滅亡。宗祀即斬。徒為寓公。全生忍辱。故祇有死社稷之義。並無他義也。亦無所謂權也。孟子之說。自以效死勿去為正。其引太王事。不過廣為譬說耳。戰國擾攘。滕文更向何處遷哉。徙。孟子第二

三 春秋之義。國滅固當死社稷。戰敗亦當死難。其不能死而被獲。或已獲而逃脫者。皆絕之。成公二年。晉卻克帥聯軍與齊頃公戰。師還公。頃。晉卻克投戟逡巡再拜稽首馬前。逢丑父者。頃公之車右也。面目與頃公相似。衣服與頃公相似。代頃公當左使。頃公取飲。頃公取

操而^敬至曰革取清者頃公用是佚而不反逢丑父曰吾賴社稷之神靈吾君已免矣郤克曰欺三軍者其法奈何曰法斮於是斮逢丑父丑父代君之死而春秋不善之者以頃公戰敗而不能死難被獲而佚於王法當絕若善丑父是絕其君而賞其臣故不善之也

春秋繁露論逢丑父殺身以生君而不得為知權最為透闢其言曰獲虜逃遁者君子之所甚賤夫冒大辱以生其情無樂故賢人不為也而眾人疑焉春秋以為人之不知義而疑也故示之以義曰國滅君死之正也正也者正於天之為人性命也天之為人性命使行仁義而羞可恥非若鳥獸然苟為生苟為利而已是故春秋推天施而順人理以至尊為不可以生於至辱大羞故獲者絕之以至辱為不

以加於至尊大位。故雖失位弗君也。已反國復在位矣。而春秋猶有不君之辭。況其溷然方獲而虜耶。其於義也。非君定矣。若非君。則丑父何權矣。故欺三軍為大辱於晉。其免頃公為辱宗廟於齊。是以雖難而春秋不愛。丑父大義宜言於頃公曰。君慢侮而怒諸侯。是失禮大矣。今被大辱而費弗能死。是無恥也。而獲重罪。請俱死。無辱宗廟。無羞社稷。如此雖陷其身。尚有廉名。當此之時。死賢於生。故君子生以辱不如死以榮。正是之謂也。由法論之。則丑父欺而不中權。忠而不中義。以為不然。復察春秋。春秋之序辭也。置王於春正之間。非曰上奉天施而下正人。然後可以為王也。云爾。今善善惡惡。好榮憎辱。非人能自生。此天施之在人者也。君子以天施之在人者聽之。則丑

父弗忠也。天施之在人者，使人有廉恥者，不生於大辱。大辱莫甚於去南面之位而束縛為虜也。曾子曰：「辱若可避，避之而已。及其不可避，君子視死如歸，謂如頃公者也。」第三

四 凡國君不能死位及被獲後乃被人殺，則身雖死而不免於罪。定公四年，春秋曰：「夏四月庚辰，蔡公、孫歸、帥師滅沈，以沈子嘉歸殺之。」何注曰：「不舉滅為重，書以歸殺之者，責不死位也。」

五 凡君以國滅而臣於滅國之國，或奔他國者，皆為不死社稷。當絕之。莊公十年，春秋曰：「三月，宋人遷宿。」此宿君因宋滅其國，乃遷於宋而臣於宋也。又曰：「冬十月，齊師滅譚。」譚子奔莒，此國滅而奔於他國者也。書月者，皆惡其不死位而絕之也。

六 凡師敗而將不能死難致被獲者不特辱身且辱及國當絕之
宣公二年春秋曰春王二月壬子宋華元帥師及鄭公子歸生帥師
戰於大棘宋師敗績獲宋華元何注曰復出宋者非獨惡華元明恥
辱及宋國蓋春秋之例凡獲大夫皆繫國責其辱國之甚也曲禮曰
大夫死眾士死制眾謂軍師制謂君教令所使大夫職主領軍將師
若四郊多壘則為己辱故有寇難必當保國率眾禦敵以死為度士
雖不得率師若君命使之則唯致死也昔孔子射於矍相之圃而不
許責軍之將及亡國之大夫觀射以責軍之將無勇而亡國大夫不
忠且無智也禮記射義然則孔子忠國之義以致死為期者固無分
於君臣上下皆以此義責之也

七 凡將兵禦難當明候伺嚴守備若無備被獲雖不戰鬥當坐獲
襄公八年春秋曰鄭人侵蔡獲蔡公子燮公羊傳曰此侵也其言獲
何侵而言獲者適得之也蓋適值其不備而取得之也不言取而言
獲者明其非取一人之文乃用兵也又明無備見獲雖不戰當坐獲
罪也獲罪維何即當絕也蓋守禦不足恥及乎國義當死難檀弓所
謂謀人之軍師敗則死之也其不死者法亦絕之矣

八 凡民之於君本非為臣不得專以死難責之昔鄒與魯鬪鄒穆
公問於孟子曰吾有司死者三十三人而民莫之死也誅之則不可
勝誅不誅則疾視其長上之死而不救如之何則可也孟子對曰凶
年饑歲君之民老弱轉乎溝壑壯者散而之四方者幾千人矣而君

之倉廩實府庫充有司莫以告是上慢而殘下也曾子曰戒之戒之出乎爾者反乎爾者也夫民今而後得反之也君無尤焉君行仁政斯民親其上死其長矣孟子卷第三是故君不行仁政則民無效死之義務罪不在民而在君也

九 凡戰陳無勇而死於兵者為畏畏死者與壓死溺死同為三不弔白虎通曰為人臣子常懷恐懼深思遠慮志在存身今乃畏壓溺死用為不義故不弔也曾子曰大辱加於身支解毀傷即君不臣士不交祭不得為昭穆之尸食不得居昭穆之位死不得葬昭穆之域也夫壓溺而死者不能愛身輕生而得死者也畏死者不能愛義貪生而不免於死者也而三者皆同為不弔此可見孔教之中庸固不


欲人之輕生。尤不許人之貪生也。惟義所在而已矣。

十 凡為國戰死者。有國葬之禮。雖童子亦以成人之喪治之。哀公十一年春。齊伐魯。戰于郎。公叔禺人遇負杖入保者息。曰。使之雖病也。任之雖重也。君子不能為謀也。士弗能死也。不可。我則既言矣。與其鄰童汪錡往。皆死焉。魯人欲勿殤童汪錡。問於仲尼。仲尼曰。能執干戈以衛社稷。雖欲勿殤也。不亦可乎。禮記檀弓。此孔子尊敬國殤之義也。凡死國事者。謂之士行。國為斂葬。故汪錡非無親屬。而魯人斂葬之。觀禹人之言。則知為國民者。雖受繇役之病。賦稅之重。而究不可不死國難矣。嗚呼。此衛國之義也。

十一 凡死寇曰兵。言人能為國家捍難禦侮。為寇所殺者。謂之曰

兵者器仗之名言其為器仗之用也故國當祿恤其子孫異於凡人也禮記曲禮

十二 凡善死者不亡莊公八年穀梁傳曰善戰者不死善死者不亡江熙釋之曰見危授命義存君親雖沒猶存此靈魂之說也老子曰死而不亡者壽列子曰由生而生故雖終而不亡皆此義也



卷第十八 論兵

一 論兵通義

凡兵之本體固非不善視其用之何如耳孔子固以兵為傷害之物然亦以為與民俱生蓋兵也者可以偃息而不能盡廢者也夫戴禮用兵篇記孔子之言如左

公曰用兵者其由不祥乎子曰胡為其不祥也聖人之用兵也以禁殘止暴於天下也及後世貪者之用兵也以刈百姓危國家也公曰古之戎兵何世安起子曰傷害之生久矣與民皆生公曰蚩尤作兵與子曰否蚩尤庶人之貪者也及利無義不顧厥親以喪厥身蚩尤悖德而無厭者也何器之能作蜂蠆挾螫而生見害而校以衛厥身

者也。人生有喜怒，故兵之作與民皆生。聖人利用而弭之，亂人興之，喪厥身。詩云：魚在在藻，厥在志餌。鮮民之生矣，不如死之久矣。校德不塞，嗣武于孫子。第七十五。

兵不能無，故洪範八政，其八曰師。蓋亦為政者所不可少者也。然苟遇不得已之勢，則所當先去者，厥為兵。論語曰：子貢問政，子曰：足食足兵，民信之矣。子貢曰：必不得已而去，於斯三者何先？曰：去兵。子貢曰：必不得已而去，於斯二者何先？曰：去食。自古皆有死，民無信不立。

論語第十二

淮南子曰：古之用兵者，非利土壤之廣，而貪金玉之略，將以存亡繼絕，平天下之亂，而除萬民之害也。凡有血氣之蟲，含牙帶角，前爪後

距有角者觸有齒者噬有毒者螫有蹠者跌喜而相戲怒而相害天之聖也人有衣食之情而物弗能足也故羣居雜處分不均求不澹則爭爭則強脅弱而勇侵怯人無筋骨之強爪牙之利故割革而為甲鑠鐵而為刃貪昧饕餮之人殘賊天下萬人搔動莫寧其所有聖人勃然而起乃討強暴平亂世夷險除穢以濁為清以危為寧故不得不中絕兵之所由來者遠矣黃帝嘗與炎帝戰矣顓頊嘗與共工爭矣故黃帝戰於涿鹿之野堯戰於丹水之浦舜伐有苗啟攻有扈自五帝而弗能偃也又况衰世乎夫兵者所以禁暴討亂也炎帝為火災故黃帝禽之共工為水災故顓頊誅之教之以道導之以德而不聽則臨之以威武臨之以威武而不從則制之以革故聖人之用

兵也。若櫛髮耨苗。所去者少。而所利者多。卷十五

淮南子為雜家者流。本兼儒家。此其所言。固無以異於孔子。蓋兵爭之害。根於天性。其所由來者深矣。至其發動之機。尤莫切於生計。蓋羣而不足。爭心將作。此亦勢之無可如何者也。嗚呼。此孔子所以罕言利。以遏亂源。而以理財為平天下之根本也。

司馬遷律書序。首明兵之由來。次言桀紂二世窮武之害。末言漢文結和之利。其辭意全以息兵為主。其所譏世儒闇於大較。不權輕重等語。不過故為偏宕之辭。以諷漢武耳。其辭曰。

兵者聖人所以討強暴。平亂世。夷險阻。救危殆。自含血戴角之獸。見犯則校。而況於人。懷好惡喜怒之氣。喜則愛心生。怒則毒螫加。情性

之理也。

昔黃帝有涿鹿之戰。以定火災。顓頊有共工之陳。以平水害。成湯有南巢之伐。以殄夏亂。遞興遞廢。勝者用事。所受於天也。自是之後。名士迭興。晉用咎犯。而齊用王子。吳用孫武。申明軍約。賞罰必信。卒伯諸侯。兼列邦土。雖不及三代之誥誓。然身寵君尊。當世顯揚。可不謂榮焉。豈與世儒闇於大較。不權輕重。猥云德化不當用兵。大至窘辱失守。小乃侵犯削弱。遂執不移等哉。故教管不可廢於家。刑罰不可捐於國。誅伐不可偃於天下。用之有巧拙。行之有逆順耳。

夏桀殷紂。手搏豺狼。足追四馬。勇非微也。百戰克勝。諸侯懾服。權非輕也。秦二世宿軍無用之地。連兵於邊陲。力非弱也。結怨匈奴。結禍。

於越勢非寡也。及其威盡勢極。閭巷之人為敵國。咎生窮武之不知足。甘得之心不息也。

高祖有天下。三邊外畔。大國之王。雖稱蕃輔。臣節未盡。會高祖厭苦軍事。亦有蕭張之謀。故偃武一休息。羈縻不備。歷至孝文即位。將軍陳武等議曰。南越朝鮮。自全秦時內屬為臣子。後且擁兵阻阨。選蠕觀望。高祖時天下新定。人民小安。未可復興兵。今陛下仁惠撫百姓。恩澤加海內。宜及士民樂用。征討逆黨。以封疆。孝文曰。朕能任衣冠。念不到此。會呂氏之亂。功臣宗室共不羞恥。誤居正位。常戰戰慄慄。恐事之不終。且兵凶器。雖克所願。動亦耗病。謂百姓遠方何。又先帝知勞民不可煩。故不以為意。朕豈自謂能。今匈奴內侵。軍吏無功。邊

民父子荷兵日久。朕常為動心傷痛。無日忘之。今未能消距。願且堅邊設候。結和通使。休寧北陲。為功多矣。且無議軍。故百姓無內外之繇。得息肩於田畝。天下殷富。粟至十餘錢。鳴雞吠犬。狗煙火萬里。可謂和樂者乎。

太史公曰。文帝時。會天下新去湯火。人民樂業。因其欲。然能不擾亂。故百姓遂安。自年六七十翁。亦未嘗至市井。游敖嬉戲。如小兒狀。孔子所稱有德君子者耶。史記第二十五

世人以爭利之故而用兵。然用兵者。每失其利。而反得其害。觀於漢文之已事。然後知結和通使者之為利多也。天下殷富。百姓安樂。非和平之明效大驗耶。

班固曰。聖人既躬明愍之性。必通天地之心。制禮作教。立法設刑。動緣民情。而則天象地。故曰先王立禮。則天之明。因地之性也。刑罰威獄。以類天之震曜殺戮也。溫慈惠和。以效天之生殖長育也。書云。天秩有禮。天討有罪。故聖人因天秩而制五禮。因天討而作五刑。大刑用甲兵。其次用斧鉞。中刑用刀鋸。其次用鑕鑿。薄刑用鞭扑。大者陳諸原野。小者致之市朝。其所繇來者上矣。漢書第二十三。蓋兵者刑之大者也。

孔子之太平世。至於無兵。故堯典九官。無掌兵者。惟併其事於刑而已。雖以蠻夷滑夏。寇賊姦宄。而士師足以治之。此其所以不立兵官也。班固志刑。不志兵。有旨哉。

凡善為國者不師。善師者不陳。善陳者不戰。善戰者不知死。善死者不亡。穀梁傳莊公八年道德齊禮則鄰國望我。歡若親戚。何師之為。上兵伐謀。何乃至陳。軍陳嚴整。敵望而畏之。何至於戰。戰則必克。更何至死。雖死猶生。則身亡而魂在。國滅而復存。又何至亡。是故為國之道。太上不師。此專尚德教。並兵而無之者也。其次有兵而不設。是不陳也。其次設兵而不用。是不戰也。其次用兵而不敗。是不死也。又其次兵敗身死。而浩氣常存。國魂不滅。是不亡也。

二 軍制

一 凡軍制。五人為伍。五伍為兩。四兩為卒。五卒為旅。五旅為師。五師為軍。一軍萬二千五百人。三軍三萬七千五百人也。穀梁傳曰。天

子有六軍。諸侯上國三軍，次國二軍，下國一軍。上國者，方伯也。所以三軍者，戒非常，伐無道，尊宗廟，重社稷，安不忘危也。下國所以一軍者，諸侯藩屏之臣也。任兵革之重，距一方之難，故得有一軍也。百虎通：凡軍以乘為數，每一乘甲士十人，步卒十五人，每軍五百乘。采芑之詩曰：其車三千，天子六軍也。魯頌曰：公徒三萬，次國二軍，千乘舉大數也。此軍備之限制也。魯本當二軍，及孔子前十一年，即襄公十一年，魯作三軍。春秋譏之。至孔子十五年，即昭公五年，魯舍中軍。春秋乃善其復古，特書以褒之。蓋兵者出於保衛之不得已，以能自衛為限。若增兵踰制，則在己國為耗蠹，對鄰國為爭雄，非和平之道也。故踰限則譏之，而守限則善之。此孔子弭兵之義也。

二 凡擴張軍備者孔子惡之。成公元年春秋曰：三月作丘甲。丘者何？一百二十八家之民也。譏成公使一丘之民皆作甲也。穀梁傳曰：「甲國之事也。丘作甲，非正也。古者立國家，百官具，農工皆有職，以事上。古有^者四民：有士、民、有商、民、有農、民、有工、民。夫甲非人人之所能為也。丘作甲，非正事也。蓋古者作甲之事，由國家兵工廠為之。今成公增加兵額，使丘民自出甲，是奪農民之業以擴張軍備也。故春秋書以譏之。」

三 凡民年三十始受兵，重絕人世也。師行不必反，戰不必勝，故須其有世嗣也。年六十還兵，不忍並鬪人父子也。故王制曰：六十不與服戎。又曰：八十者一子不從政，九十者其家不從政，廢疾非人不養。

者一人不從政。父母之喪三年不從政。齊衰大功之喪三月不從政。

百虎通

三 習戰

一 凡既有國家即當有守備。故教民習戰為不得已之事。蓋訓練之於平日。乃不至破敗於臨時也。論語子路一篇多言政治。而其末二章乃以孔子之言教戰者終焉。曰善人教民七年亦可以即戎矣。又曰以不教民戰是謂棄之。鄭重沈詳。聖人之情見乎辭矣。教民者教之以孝弟忠信之行。務農講武之法。即子路所謂使之有勇且知方者也。論語第十一。夫善人為邦以勝殘去殺為貴。似無所用乎即戎。然其效非百年不能成。而百年之內無萬一兵禍猝起。將何以禦。

之。又即邦內可以勝殘去殺而外患驟至將何以捍之。此善人以愛民為心。所以不得不教民以即戎也。至於教民七年乃始可以即戎。此以見教戰之不可不早也。若夫以不教之民而戰則棄之而已矣。無倖勝之道也。此言不教民之害也。夫不曰教兵而曰教民。蓋民盡為兵而兵民不分。此中國之古制。而孔子欲加意保存之。使民可即戎而不致有棄民之禍也。孔子曰。愛之能勿勞乎。論語第十四。正惟。有愛民之心。斯不得不勞民於習戰。此所以為善人也。豈與夫好戰之主同日而語哉。

孟子曰。不教民而用之。謂之殃民。殃民者不容於堯舜之世。亦孔子教民習戰之義也。第十二

穀梁傳曰以其不教民戰則是棄其師也為人君而棄其師其民孰以為君哉僖公二十三年是故棄民者民亦棄之以不教民戰而棄民其禍必至於失民是自棄也

二 凡習戰之禮當有定期不可疏亦不可數故比年簡徒謂之蒐三年簡車謂之大閱五年大簡車徒謂之大蒐存不忘亡安不忘危也若為期太疏則春秋以罕書之桓公六年春秋曰秋八月壬午大閱是也不地者常地也蒐例時此日者桓既無文德又忽忘武備故尤危而錄之也夫有文德者尚不可無武備况兩俱無之哉昭公八年春秋曰秋蒐于紅十一年夏又曰大蒐于比蒲定公十三年夏又曰大蒐于比蒲凡此皆譏其罕也然定公十四年秋又曰大蒐于比

蒲此則為期太數以五年一舉之禮而比年行之春秋譏其亟矣

三 凡定期習戰之外又有臨時習戰之禮凡臨時而有兵事者以習戰始終之其始則出曰祠兵禮兵不徒使故將出兵必祠於近郊即祠五兵戈戟劍楯弓矢及始造兵者也於是陳兵習戰殺牲饗士卒此祠兵之禮也其終則入曰振旅兵事以嚴終也振旅與祠兵之禮如一皆習戰也將出不嫌不習故以祠兵言之將入嫌於廢之故以振訊士眾言之互文見義耳祠兵則幼賤在前難在前而貴勇力也振旅則尊在老在前復常儀且衛後也公羊傳穀梁傳莊公八年

甲 田獵

凡正式習戰之外又有因田獵而講武之禮王制曰天子諸侯無事

則歲三田。公羊傳曰：春曰苗，秋曰蒐，冬曰狩。桓公四年，古者四時皆田。至孔子作春秋，乃改為夏不田，以為飛鳥未去於巢，走獸未離於穴，恐傷害於幼稚，故不以夏田也。此以見孔子之愛及禽獸也。又因每年以四時講武，未免太數，故減為三時也。人君曷為必田狩？一為乾豆，二為賓客，三為充君之庖。以上殺次殺下殺第之也。已有三牲，猶必田狩者，孝子之意，以為己之所養不如天地自然之牲，逸豫肥美，故自加功力，親自取禽，以恭奉宗廟也。且禽獸多則傷五穀，故因以為田除害也。又兵者守國之備，而凶事不可空設，故寄其教於田獵於農事之隙，簡集士眾，順時而講武焉，所以示不忘武備也。禮記郊特牲曰：仲春出火，為焚也。然後簡其車賦，而歷其卒伍，而君

親誓社以習軍旅左之右之坐之起之以觀其習變也而流示之禽
而^鹽諸利以觀其不犯命也求服其志不貪其得故以戰則克以祭
則受福夫習戰以不犯命為主而其命以不艷利不貪得為訓此其
所以為紀律之師而戰則必克也

穀梁傳曰因蒐狩以習用武事禮之大者也艾蘭以為防置旃以為
轅門以葛覆質以為繫流旁握御輦者不得入車軌塵馬候蹄擗禽
旅御者不失其馳然後射者能中過防弗逐不從奔之道也面傷不
獻不成禽不獻禽取雖多天子取三十焉其餘與士眾以習射於射
宮射而中田不得禽則得禽田得禽而射不中則不得禽是以知古
之貴仁義而賤勇力也昭公八年夫古之所謂習戰^武者如是然則貴

仁義而賤勇力。洵可謂中國人之特性矣。

乙 非崇武

凡非正式習戰之時。又非田獵講武之日。而大修戎事。是為崇武。春秋譏之。穀梁傳曰。脩教明諭國道也。平而脩戎事。非正也。桓公六年。是故孔子立國之道。乃以脩教明諭為主。所謂道之以德。齊之以禮。耀德不觀兵者也。春秋以崇武為非正。然則近人以外患日迫。倡尚武主義。以相號召者。固不合於孔教之治道矣。孔教者崇禮尚義。備武而不用武者也。若以尚武為號。則矯枉過正。非我中國立國之精神矣。

四 射禮

古者以弓矢為最利之武器。故以射為普通教育。且以為上下通行之大禮。及選舉賞罰之標準。故男子始生三日。即以桑弧蓬矢六射。射天地四方。以男子當上事天。下事地。旁禦四方之難。天地四方皆男子所有事也。禮射唯四矢者。以天地非躬射事所及。唯禦四方故也。（禮記內則）若男子而不能射。則於男子之資格為不完全。故孔子曰。士使之射。不能。則辭以疾。縣弧之義也。禮記郊特牲。原射之所以重要者。固為嫻習武藝。以收全國皆兵之益。亦為惇行禮義。以範勇敢強力之人也。

射義曰。古者諸侯之射也。必先行燕禮。大夫士之射也。必先行鄉飲

酒之禮故燕禮者所以明君臣之義也鄉飲酒之禮者所以明長幼之序也故射者進退周旋必中禮內志正外體直然後持弓矢審固然後可以言中此可以觀德行矣

持弓矢審固

其節天子以騶虞為節諸侯以貍首為節卿大夫以采蘋為節士以采芣為節騶虞者樂官備也貍首者樂會時也采蘋者樂循法也采芣者樂不失職也是故天子以備官為節諸侯以時會天子為節卿大夫以循法為節士以不失職為節故明乎其節之志以不失其事則功成而德行立德行立則無暴亂之禍矣功成則國安故曰射者所以觀盛德也

是故古者以射選諸侯卿大夫士射者男子之事也因而飾之以禮

樂也。故事之盡禮樂而可數為，以立德行者，莫若射。故聖王務焉。

是故古者天子之制，諸侯歲獻貢士於天子。天子試之於射宮。其容體比之於禮，其節比之於樂。而中多者，得與於祭；其容體不比於禮，其節不比於樂，而中少者，不得與於祭。數與於祭，而君有慶；數不與於祭，而君有讓。數有慶而益地，數有讓而削地。故曰射者，射為諸侯也。是以諸侯君臣盡志於射，以習禮樂。夫君臣習禮樂而以流亡者，未之有也。是以天子制之，而諸侯務焉。此天子之所以養諸侯而兵不用，諸侯自為正之具也。

射禮至大禮也。非勇敢強有力者弗能行也。聘義曰：酒清人渴而不敢飲也。肉乾人飢而不敢食也。曰：莫人倦。齊莊正齊而不敢解惰，以

成禮節以正君臣以親父子以和長幼此衆人之所難而君子行之故謂之有行有行之謂有義有義之謂勇敢故所貴於勇敢者貴其能以立義也所貴於立義者貴其有行也所貴於有行者貴其行禮也故所貴於勇敢者貴其敢行禮義也故勇敢强有力者天下無事則用之於禮義天下有事則用之於戰勝用之於戰勝則無敵用之於禮義則順治外無敵內順治此之謂盛德故聖王之貴勇敢强有力如此也勇敢强有力而不用於禮義戰勝而用之於爭鬪則謂之亂人刑罰行於國所誅者亂人也如此則民順治而國安也

要而論之射者保和之道也其一則對外而保和齊風猗嗟之詩曰四矢反兮以禦亂兮故全國男子悉皆習射以合於軍人資格而禦

四方之亂。天下有事。則用之於戰勝。而無敵於天下。功成則國安。此之謂也。其二則對內而保和。射義曰。射之為言者。繹也。繹者。各繹己之志也。故曰。為人父者。以為父鵠。為人子者。以為子鵠。為人君者。以為君鵠。為人臣者。以為臣鵠。故射者。各射己之鵠。射者。仁之道也。射求正諸己。己正而後發。發而不中。則不怨勝己者。反求諸己而已矣。夫人苟正己而不求諸人。則各正其志於己之鵠。以求不失其事。而無一毫放越怨嫉之心。此之謂飾禮樂而立德行也。德行立則無暴亂之禍。而君皆自正而不暴。臣民皆順治而不亂矣。習禮樂則天子諸侯卿大夫士庶皆自為正。斷無流亡爭鬪之事。而兵不用矣。吾故曰。射者保和之道也。

時至今日。鎗礮出而弓矢失其利。習射之禮。當移之於燒鎗矣。
古者又有投壺之禮。主人與客燕飲。講論才藝之禮也。射投壺皆所
以習武。因以為樂。故事多相類。投壺即射之細者也。今日弓矢既失。
効力則投壺更無所謂。習武祇游藝之一種耳。然有合於射以觀德
之義。且為古禮之遺。故吾今尚行之。亦願天下人行之。比諸他種游
戲。較為有益也。

五 軍禮

一 凡君子戒慎。不失色於人。故介冑則有不可犯之_色也。兵車不式
者。尚威武而不崇敬也。武車綏旌者。尚威武而揚文飾也。禮記曲禮
司馬法曰。古者國容不入軍。軍容不入國。軍容入國則民德廢。國容

入軍則民德弱。故禮與法表裏也。文與武左右也。第二若今之歐俗。則頗有軍容入國之嫌也。

二 凡乘兵車者。出先刃。入後刃。不以刃嚮國也。禮記少儀

三 凡行伍之所尚。軍尚左。卒尚右。左陽而主生。故軍將以為上。貴不敗績也。右陰而主殺。故士卒以為上。示有死志也。少儀

四 凡兵車之坐位。唯元帥在中。御者在左。其餘將帥皆御者在中。

將帥在左。至車右則皆在右。左傳疏成公十六年

五 凡軍行前驅有所逢值。則舉畫象旌首以警眾。曲禮曰。前有水則載青旌。前有塵埃則載鳴鳶。前有車騎則載飛鴻。前有士師則載虎皮。前有摯獸則載貔貅。此古禮也。左傳所謂前茅慮無是也。宣公

十二年杜預謂如今軍行前有斥候躡伏皆持以絳及白為幡見騎賊舉絳幡見步賊舉白幡此又晉時之法也

六 凡軍陳之法曲禮明之曰行前朱鳥而後玄武左青龍而右白虎招搖在上急繕其怒進退有度左右有局各司其局朱鳥四物是為陳法後世失傳唐時畫此四獸於旌旗以標前後左右之軍陳要而言之古之陳法雖不得而知然必堅勁威怒整齊嚴肅不僥倖以求勝亦不散亂以致敗則可斷言也軍前宜捷故用朱鳥軍後須殿捍故用玄武左為陽發生之象故用龍右為陰殺伐之氣故用虎此命名之義也

七 凡伐者凶事故王者征伐必皮弁素幘素服示有悽愴也伐者

質故衣古服也百虎通

凡天子將出征類乎上帝宜乎社造乎禰禡於所征之地受命於祖受成於學出征執有罪反釋奠於學以訊馘告諸侯與天子同禮惟不得類乎上帝耳王制訊者生獲馘者所格殺者之左耳禮非征伐有罪不得用兵故生獲之囚當獻於學而由善問者聽其獄獻馘者不過取一二所格者之左耳以告藉表罪人斯得之意耳

九 凡方伯征伐不道諸侯交格而戰者誅絕其國獻捷於王者公羊傳注莊公三十一年左傳曰凡諸侯有四夷之功則獻于王王以警于夷中國則否諸侯不相遺俘又曰蠻夷戎狄不式王命淫誨毀常王命伐之則有獻捷王親受而勞之所以懲不敬勸有功也兄弟

錫舅侵敗王略王命伐之告事而已不獻其功所以敬親暱禁淫慝也莊公三十一年成公二年據左傳之說則征伐諸夏無獻捷之禮而公羊則有之蓋交格而戰至於誅絕其國則可獻其捷不然則否也惟獻捷之禮僅施於王者若諸侯則無互相獻捷之道也

孔穿字子高孔子六世孫也子高適魏會秦兵將至信陵君懼造子高之館而問祈勝之禮焉子高曰命勇謀之將以禦敵先使之迎于敵所從來之方為壇祈克于五帝衣服隨其方色執事人數從其方之數牲則用其方之牲祝史告於社稷宗廟邦域之畧山大川君親素服誓眾于太廟曰某人不道犯侵犯大國二三子尚皆同心比力死守將帥稽首再拜受命既誓將帥勒士卒陳於廟之廟於右君立太廟

之庭。祝史立於社。百官各警其事。御於君以待命。乃大鼓於廟門。詔將帥命卒習射。三發擊刺。三行告廟。用兵於敵也。五兵備効。乃鼓而出。以即敵。此諸侯應敵之禮也。信陵君曰。敬受教。孔叢子第十二。孔鮒字子魚。孔子八世孫也。孔子三百四十三年。陳涉興兵誅秦。尊為太師。問以軍禮。鮒答之甚悉。謹述之以存古義。

陳王問太師曰。行軍之禮。可得備聞乎。答曰。天子有道。禮樂征伐。自天子出。必歲之孟春。賞軍帥武人于朝。簡練傑俊。任用有功。命將選士。以誅不義。於是孟冬。以級授軍。司徒執朴。北面而誓之。誓於社。以習其事。先期五日。太師筮於祖廟。擇吉日齋戒。告於郊社稷宗廟。既筮。則獻兆於天子。天子使有司以牲特告社。告以所征之事。而受命。

焉。舍奠於帝學以受成。然後乃類於上帝。柴於郊以出。以齋車遷廟
之主及社。行。大司馬職奉之。無遷主。廟則以幣帛皮圭告於祖禰。謂之
主命。亦載齋車。凡行主皮圭幣帛。皆每舍奠焉。而後就館。主車止於
中門之外。外門之內。廟主居於道左。社主居於道右。其所經名山大
川皆祭告焉。及至敵所。將戰。太史卜戰日。卜右御。先期三日。有司明
以敵人罪狀告之。史史定誓命戰日。將帥陳列車甲卒伍於軍門之
前。有司讀誥誓使周定。三令五申既畢。遂禱戰祈克於上帝。然後即
敵。將士戰全已克敵。史擇吉日復禱於所征之地。柴於上帝。祭社奠
祖。以告克者。不頓兵傷士也。戰不克則不告也。凡類禱皆用甲丙戊
庚壬之剛日。有司簡功行賞。不稽於時。其用命者則加爵受賜於祖。

奠之前其奔北犯令者則加刑罰戮於社主之前然後鳴金振旅有司徧告捷於時所有之山川既至舍於國外三日齋以特牛親格於祖禰然後入設奠以反主若主命則卒奠斂主埋之於廟兩階間反社主如初迎之禮舍奠於帝學以訊馘告大享於羣吏用備樂饗有功於祖廟舍爵策勲焉謂之飲至天子親征之禮也陳王曰其命將出征則如之何太師曰古者大將受命而出則忘其國即戎師陣則忘其家故天子將命將出征親潔齋盛設奠於祖以詔之大將先入軍吏畢從皆北面再拜稽首而受天子當階南面命授之節鉞大將受天子乃東向西面而揖之亦弗御也然後告太社冢宰執脰立於社之右南面授大將大將北面稽首再拜而受之承所頒賜於軍吏

其出不類其克不禡戰之所在有大山川則祈焉禱克於五帝捷則報之振旅復命簡異功勤親告廟告社而後適朝禮也王曰將居軍中之禮勝敗之變則如之何太師曰將帥尚左士卒尚右出國先鋒入國後刃介冑在身執銳在列雖君父不拜若不幸軍敗則驛騎赴告於載櫜輶天子素服哭於庫門之外三日大夫素服哭於社亦如之亡將失城則皆哭七日天子使使迎於軍命將帥無請罪然後將帥結草自縛袒右肩而入蓋喪禮也王曰行古禮如何太師曰古之禮固為于今也有其人行其禮則可無其人行其禮則民弗與也孔

叢子第十八

六 兵學

孔子之志固在偃兵然孔子非不知兵者也孔子曰我戰則克禮記禮器言得其道也論語記孔子之所慎齊戰疾戰固孔子之所慎也子路曰子行三軍則誰與子曰暴虎馮河死而無悔者吾不與也必也臨事而懼好謀而成者也臨事而懼好謀而成即所謂慎戰也此孔子之兵學也論語第七

孔子之兵學其自試而畧見其端者則頰谷之會是矣孔子五十二歲為魯公^定十年春秋曰春王三月及齊平夏公會齊侯于頰谷公至自頰谷穀梁傳曰離會不致何為致也危之也危之則以地致何也為危之也其危奈何曰頰谷之會孔子相焉兩君就壇兩相相揖齊

人鼓噪而起。欲以執魯君。孔子厯階而上。不盡一等。而視歸乎齊侯。曰。兩君合好。夷狄之民何為來為。命司馬止之。齊侯遂巡而謝。曰。寡人之過也。退而屬其二三大夫曰。夫人率其君與之行人之道。二三子獨率我而入夷狄之俗。何為罷會。齊人使優施舞於魯君之幕下。孔子曰。笑君者罪當死。使司馬行法焉。首足異門而出。齊人來歸鄆。謹龜陰之田者。蓋為此也。因是以見。雖有文事。必有武備。孔子於頰谷之會見之矣。蓋優施戲笑而舞。欲候隙以執定公。故孔子不得不誅之。隱以折強鄰。詐劫國君之謀。明以正匹夫熒惑諸侯之罪。一言而威重於三軍。不特魯君由是而脫險。而齊人且歸田以謝過。在聖人固不欲藉此見長。然變起倉卒。而能以禮法鎮定之。備武而不用。

武刑一人而不至動兩國之兵。於以保障和平。國交益固。亦聖人之智勇隨事發露。行乎其所不得不行者也。

孔子於用兵。不獨自能之。即其弟子亦能之。蓋孔子亦或以是教弟子也。孔子六十八歲。冉有為季氏將師。與齊戰于郎。克之。季康子曰。子之於軍旅。學之乎。性之乎。冉有曰。學之於孔子。史記第四十七。此固弟子推尊其師之言。然亦必於講學之餘。偶或及之者也。蓋生當亂世。國爭方烈。凡為男子。皆有當兵之義務。其勢不能不學。故孔子雖專以詩書禮樂教弟子。而軍旅之學。亦不能盡廢。此聖門所以有將才也。

冉有之戰績。左傳詳載之。哀公十一年春。齊國書高無丕帥師伐魯。

及清季孫謂其宰冉求曰齊師在清必魯故也若之何求曰一子守
二子從公禦諸竟季孫曰不能求曰居封疆之間季孫告二子二子
不可求曰若不可則君無出一子帥師背城而戰不屬者非魯人也
魯之羣室眾於齊之兵車一室敵車優矣子何患焉二子之不欲戰
也宜政在季氏當子之身齊人伐魯而不能戰子之恥也大不列於
諸侯矣季孫使從於朝俟於黨氏之講武叔呼而問戰焉對曰君子
有遠慮小人何知懿子強問之對曰小人慮材而言量力而共者也
武叔曰是謂我不成丈夫也蓋知冉求非己不欲戰故不對也退而
蒐乘孟懿子之子孟孺子洩帥右師顏羽御邴洩為右冉求帥左師
管周父御樊遲為右樊遲者名須亦孔子弟子也季孫曰須也弱有

子曰就用命焉。季氏之甲七千，冉有以武城人三百為己徒卒。老幼守宮，次于雩門之外。師及齊師，戰于郊。齊師自稷曲，師不踰溝。樊遲曰：「非不能也，不信子也。」請三刻而踰之，如之。眾從之。師入齊軍，獲甲首八十。齊人不能師。宵諜曰：「齊人遁。」冉有請從之。三季孫弗許。冉有用矛於齊師，故能入其軍。孔子曰：「義也。」惟右師本不欲戰，及戰又奔。故左戰師雖勝，而齊魯兩軍之勝敗實相等耳。是役也，魯幾亡國，脫非冉有樊遲，則祇有束手待斃而已。此以見孔子之教之大有造於宗國也。

子路為孔子^門之著名勇士。孔子曰：「由也，千乘之國，可使治其賦也。」此孔子之許其能治軍也。子路曰：「千乘之國，攝乎大國之間，加之以師。」

旅因之以饑饉由也為之比及三年可使有勇且知方也此子路之
自許為能治軍也方者禮義也教以禮義而使之知此所以為孔門
之兵學也論語第五第十二哀公十四年小邾射以句繹來奔曰使
季路要我吾無盟矣使子路子路辭季康子使冉有謂之曰千乘之
國不信其盟而信子之言子何辱焉對曰魯有事于小邾不敢問故
死其城下可也彼不臣而濟其言是義之也由弗能觀此則子路之
信足以不盟勇足以致死義足以自潔均可見矣左傳又哀公十五
年子路為衛大夫孔悝之邑宰衛太子蒯聵與其子衛出公爭國劫
孔悝以登臺子路在外聞亂而往救之遇子羔出衛城門謂子路曰
出公去矣而門已閉子可還矣毋空受其禍子路曰食其食者不避其

難遂入。謂蒯聵曰：「太子焉用孔悝？雖殺之，必或繼之。」且曰：「太子無勇，若燔臺，必舍孔叔。」太子聞之懼，下石乞、孟賁敵子路，以戈擊之，斷纓。子路曰：「君子死，冠不免。」結纓而死。孔子聞衛亂，曰：「嗟乎，由死矣！」左傳史記第六十七蓋子路輕死重義之概，早為孔子所深知也。

七 用兵之義

一 凡保伍連帥，本有用兵征伐之道。故春秋不以諸侯擅興兵為大惡。僖公二十七年，秋，公子遂帥師入杞。春秋不諱是也。然不能免於小惡矣。

二 凡人雖無禮於己，己不當因是用兵。僖公二十七年春，杞子來朝，無禮不備，而魯以是入杞。故春秋於秋八月書曰：「乙巳，公子遂帥師。」

師入杞何注曰日者杞屬脩禮朝魯雖無禮君子躬自厚而薄責於人不當乃入之故錄責之正以春秋入例時傷害多則月而今日以責之也

三 凡人雖誑己而事由己致當內自責不當侵人僖公四年春齊桓公假塗于陳而伐楚其師不正夏陳人患其苦誑之使不由陳還師遵海而東師大陷于沛澤之中桓公乃執陳袁濤塗以罪之後復侵陳春秋書之曰冬十有二月公孫慈帥師會齊人宋人衛人鄭人許人曹人侵陳何注曰月者刺桓公不脩其師因見患誑不內自責乃復加人以罪蓋侵伐例時而今書月所以刺齊桓也

四 凡師行而令人厭者為不正之師古者周公東征則西國怨西

征則東國怨。故詩曰：周公東征，四國是皇。蓋周公征東方，而四方皆正。此其師正而令人思者也。僖公四年，齊師欲徑陳，陳不果內師，不正而令人厭者也。公羊傳法言第九。

五 凡國君不得為匹夫興師。敵國若施無道於國君，則可以為之興師。若施無道於匹夫，則不得為之興師。蓋君為公位，有代表國家之資格，而匹夫為私人，其數多至不可勝_數。若必欲為匹夫興師，祇可因公託私。苟以公事趨私事，則國際之間不免於亂矣。昔伍子胥以其父無罪而為楚所殺，去楚奔吳。吳王欲為之興師復讎，子胥止之曰：「諸侯不為匹夫興師。」及楚為無道，拘蔡昭公數年，放歸後復以其有怨言而伐之。於是子胥勸吳王興師救蔡，大敗楚師。此其例也。公

羊傳穀梁傳定公四年

六 凡為善不終始以兵救人後復以兵侵之春秋不與也宣公元
年秋春秋曰楚子鄭人侵陳晉趙盾帥師救陳書帥師者善救陳也
六年又曰春晉趙盾衛孫免侵陳穀梁傳曰此帥師也其不言帥師
何也不正其敗前事故不與帥師也此孔子善救援而惡侵伐之義
也

七 凡兵以理判曲直救兵非必可善呂不韋有言兵苟義攻伐亦
可救守亦可兵苟不義攻伐不可救守不可僖公十八年春秋曰春
王正月宋公會曹伯衛人邾婁人伐齊蓋齊桓公死豎刁易牙爭權
不葬宋襄公為是伐之故春秋以為義兵而書月也其下書曰夏師

救齊伐者義則救者不義矣故此雖救而不善也

僖公二十八年左傳曰師直為壯曲為老豈在久乎此又以理之曲直判兵氣之壯老也

八 凡出兵伐人而能以力服義不戰而退春秋大之文公十四年晉卻缺帥師革車八百乘以納接菑于邾婁力沛若有餘邾婁人言曰接菑晉出也纍且齊出也貴則皆貴矣雖然纍且也長卻缺曰非吾力不能納也義實不爾克也引師而去之故君子大其弗克納也書曰晉人納接菑于邾婁弗克納蓋大其不以己之非奪人之是屈強大之力以服從公義也易曰乘其墉弗克攻吉象曰乘其墉義弗克也其吉則困而反吉也同人猶此義也

九 凡本國有喪不當用兵。用兵則不孝。昔晉文公於僖公三十二年十二月卒。以明年四月癸巳葬。而晉襄公於葬前之十二日敗秦師于殽。春秋書之曰。夏四月辛巳。晉人及姜戎敗秦于殽。穀梁傳曰。晉人者。晉子也。其曰人何也。微之也。何為微之。不正其釋殯而主乎戰也。公羊傳曰。君在乎殯而用師。危不得葬也。非惟背殯用師。春秋以為不子也。即既葬而用兵。然苟未踰年。亦為不子。昔鄭襄公於成公四年三月卒。既葬。鄭悼公於是年冬伐許。春秋惡之。書曰。鄭伯伐許。蓋未踰年之君。當稱子。不當稱爵。今以悼公居喪伐人。不成為子。故稱鄭伯以著其罪也。又非惟獨自用兵之為不子也。即隨從聯軍。惡亦不減。如襄公九年。服母喪未踰年。而隨諸侯伐鄭。春秋不書致。

奪其臣子辭也。

十 凡王者有三年之喪而有夷狄內侵之事則為宗廟社稷之重不得不從權出師此變禮也。百虎通所謂金革之事無辟也。禮記曾

子問

十一 凡敵國有喪不當伐之伐喪則無義。襄公十九年春秋曰晉士匄帥師侵齊至穀聞齊侯卒乃還公羊傳曰還者何善辭也何善爾大其不伐喪也以為恩足以動孝子之心義足以服諸侯之君故是後兵寢四年也是故諸侯有三年之喪雖有罪且不誅哀孝子之思慕不忍加刑罰也。百虎通

十二 凡因人之困而伐之是為不仁。僖公二十三年春秋曰春齊

侯伐宋圍緡公羊傳曰邑不言圍此其言圍何疾重故也何注曰疾痛也重故喻若重故創矣襄公欲行霸守正履信屬為楚所敗諸夏之君宜雜然助之反因其困而伐之痛與重故創無異故言圍以惡其不仁也

定公四年十一月吳敗楚于柏莒五年正月越入吳春秋疾越乘吳戰後罷敝而入之罪甚重故謂之於越夷狄之也

八 義兵

一 凡諸侯有數侵伐各國以自廣大者是為公敵其起而討之者為義兵僖公二十八年春秋曰三月丙午晉侯入曹執曹伯畀宋人以曹伯數侵伐諸侯以自廣大也義兵例月今日者喜義兵得時入

也。

二 凡諸侯有為無道而拘執諸侯者其討之者為義兵。昔蔡昭公朝于楚有美裘焉。囊瓦求之。昭公不與。為是拘昭公于南郢。數年。然後歸之。諸侯惡楚之無道。雜然侵之。會同最盛。春秋以其為義兵而善之也。於定公四年書曰。三月公會劉子。晉侯。宋公。蔡侯。衛侯。陳子。鄭伯。許男。曹伯。莒子。邾婁之子。頡子。胡。滕伯子。薛伯。杞伯。小邾婁子。齊國夏于召陵。侵楚。

三 凡諸侯起兵以伐他國篡弑之賊者為義兵。桓公十五年。鄭伯突篡國。諸侯伐之。春秋書曰。冬十有一月公會齊侯。宋公。衛侯。陳侯。于侈。伐鄭。何注曰。月者。善諸侯征突。善錄義兵也。

四 凡起兵以誅他國之亂臣賊子者為義兵。雖或不能誅，猶有屈
彊之功。疾惡之，正齊慶封，脅齊君而亂齊國，以襄公二十八年走之。
吳昭公四年，春秋曰：秋七月，楚子蔡侯、陳侯、許男、胡子、沈子、淮
夷伐吳，執齊慶封，殺之，為齊誅也。稱爵以執大夫，伯討也。書月者，善
義兵也。宋魚石以成公十五年奔楚，楚於十八年伐宋，取彭城，以封
魚石。魚石託外兵以伐，取君邑，遂居之，以與君相拒。襄公元年，春秋
曰：仲孫蔑會晉欒黶、宋華元、衛甯殖、曹人、莒人、邾婁人、滕人、薛人、圍
宋彭城，為宋誅也。蓋諸侯助宋君討叛臣，義之高者。雖不能誅，猶有
屈彊臣之功。故春秋善之也。又文公元年十月，楚世子商弒其君
髡。明年，春秋曰：夏六月，公孫敖會宋公、陳侯、鄭伯、晉士穀盟于垂簾。

何注曰盟不日者欲共盟誅商臣雖不能誅猶為疾惡故也褒與信辭也蓋盟例大信時小信月不信日今不日而月故為褒與信辭也
五 凡世子去父出奔已為不孝若復犯先君傳統之命而還盜父國則為先君舊臣者義得距之其諸侯出兵圍攻盜國之人亦得為伯討公羊傳哀公三年

六 凡諸侯起兵以平他國內亂者為義兵僖公十七年十二月齊桓公卒豎刁易牙爭權不葬宋襄公為是之故於十八年伐之春秋書曰春王正月宋公會曹伯衛人邾婁人伐齊月者與襄公之征齊善錄義兵也

七 凡隨同義兵征伐者春秋善其比與善行義故桓公之出不致

而十六年特書曰秋七月公至自伐鄭既致之復加月也又齊桓霸道衰曹獨從之征伐不義故曹小國宜稱人不合稱師而春秋於僖公十五年書曰秋七月齊師曹師伐厲褒曹而稱師所以勸勉不能扶助霸功激揚懈惰也

八 凡夷狄助義兵則進之春秋於昭公五年進越稱人是也

九 凡兵之所鄉苟得其罪則莫敢不懼公羊傳注文公十五年

十 凡義兵所指而壅遏之使不得以時進者當被侵伐僖公二十

八年春秋曰春晉侯侵曹晉侯伐衛公羊傳曰曷為再言晉侯非兩之也然則何以不言遂未侵曹也未侵曹則其言侵曹何致其意也其意侵曹則曷為伐衛晉侯將侵曹假塗于衛衛曰不可得則固將

伐之也。蓋曹有數侵伐諸侯以自廣大之罪。故晉侯之侵曹為義師。衛壅遏之使不得以時進。故著言侵曹以致其意。所以通義兵之心。不使壅塞也。然則晉侯之意本重在侵曹。而今事實乃未侵曹而先伐衛者。則由衛自取之矣。晉侯出師之時。即有兩伐之意。侵曹伐衛。均在意計之中。並^非以師當二役。故曰非兩之也。

九 聯軍

一 凡數國合兵隨人戰伐者。與主兵者同罪。不分輕重。桓公十四年。春秋曰。宋人以齊人衛人蔡人陳人伐鄭。何注曰。四國本不起兵。當分別之。故加以也。宋恃四國乃伐鄭。四國當與宋同罪。非為四國見輕重。蓋宋齊衛蔡陳皆諸侯也。而春秋皆人之。是同罪也。惟宋為

首惡故加以以罪之穀梁傳曰以者不以者也民者君之本也使
以其死非正也蓋惟伯者得以他國之師故不言以言以者不應以
而以者也宋以所不當以四國使民以死交責之也

二凡與人訂期會師當如期而至後期則為不信然亦可因此分
別功惡淺深從義兵而後者功薄從不義兵而後者惡淺公羊傳注
莊公十四年又宣公七年左傳曰凡師出與謀曰及不與謀曰會

三凡聯軍破敵當歸功聯軍不能掩人之功蔽人之善桓公十三
年春秋曰春二月公會紀侯鄭伯己巳及齊侯宋公衛侯燕人戰齊
師宋師衛師燕師敗績公羊傳曰曷為後日特外也其特外奈何得
紀侯鄭伯然後能為日也內不言戰此其言戰何從外也曷為從外

恃外故從外也。明當歸功紀鄭故從紀鄭言戰也。成公二年春秋曰。六月癸酉季孫行父臧孫許叔孫僑如公孫嬰齊帥師會晉卻克衛孫良夫曹公子手及齊侯戰于鞏齊師敗績。何注曰。不從內言敗之者。君子不掩人之功。故從外言戰也。

四 凡與與國伐而反與與國戰。是謂聯軍不和。春秋非之。桓公十二年春秋曰。十有二月及鄭師伐宋。丁未戰于宋。穀梁傳曰。非與所與伐也。不言與鄭戰。恥不和也。於伐與戰。敗也。內諱敗。舉其可道者也。

十 用兵之節

一 凡無論戰伐圍攻。師出不踰時。所以重民之命。愛民之財。聚民

之室家。又所以免敵之困憊。春秋於隱公五年十有二月書曰。宋人伐鄭。圍長葛。穀梁傳曰。伐國不言圍邑。此其言圍何也。久之也。隱公六年。春秋又書曰。冬。宋人取長葛。穀梁傳曰。外取邑不志。此其志何也。久之也。蓋暴師經年。僅而後克。無仁隱之心。而有貪利之行。故書以疾之也。

鹽鐵論曰。古者行役不踰時。春行秋反。秋往春來。寒暑未變。衣服不易。固已還矣。今則徭役極遠。盡寒苦之地。危難之處。今茲往而來。歲還。父母延頸而西望。男女怨曠而相思。故一人行而鄉曲恨。一人死而萬人悲。第三十九。此引經義以正漢時之久役也。

夫戰不必勝。攻不必取。而孔子立法以為師出不踰三月之時者何。

也。蓋以為王者之兵，有征而無戰，且兵以義出，戰則必勝也。又攻城之道，並不志在得地，服則舍之，雖不服而踰時亦退。昔文王聞崇德亂而伐之，軍三旬而不降，退脩教而復伐之，因壘而降。左傳僖公十九年，任德而不任力也。若宋人之圍長葛，則志在必得其地，故春秋惡其彊而無義，如其意而言圍也。公羊傳注宣公十四年，春秋曰：秋九月，楚子圍宋。夫春秋之例，圍書時。今月者，惡其久圍宋。至於明年五月，使宋易子而食也。

二 凡兵凶器，戰危事，不得已而用之，不當以師假人，人亦不當乞他國之師，不當以他國之師。僖公二十六年，春秋曰：公子遂如楚，乞師。穀梁傳曰：乞，重辭也。何重焉？重人之死也，非所乞也。師出不必反。

戰不必勝故重之也春秋又曰公以楚師伐齊取穀穀梁傳曰以者不以者也民者君之本也使民以其死非其正也蓋謂僖公以所不當以而楚則驅民於死地以供假借之役均不合也

三 凡兵者不得已而用之若未至侵伐之地即不當中道用師所以重民命也僖公二十六年楚人假師與魯以伐齊未至而中道伐宋孔子惡其視百姓之命若草木不仁之甚也書曰楚人伐宋圍閔穀梁傳曰伐國不言圍邑此其言圍何也以吾用其師目其事也非道用師也

四 凡用兵之節當貴重民命一出師不可為兩事僖公二十五年春秋曰秋楚人圍陳納頓子于頓公羊傳曰何以不言遂兩之也蓋

圍陳圍陳納頓子自納頓子既非因頓子圍陳亦非圍陳以納頓子
春秋分別此兩事者惡楚人不重民命一出兵而為兩事使一師當
二役也

五 凡興師攻取而又用此師以任力役者春秋惡其多生事端因
極師眾文公七年春秋曰春公伐邾三月甲戌取須朐句遂城郛遂者
何繼事也以伐邾取邑之師城郛也孔子甚其勞民也公羊傳穀梁
傳

六 凡傾國之兵春秋所惡成公二年春秋曰六月癸酉季孫行父
臧孫許叔孫僑如公孫嬰齊帥師會晉卻克衛孫良夫曹公子手及
齊侯戰于鞏齊師敗績何注曰魯舉四大夫不舉重者惡內多虛國

家悉出用兵重錄內也。左傳孔穎達疏云：「魯于聘與盟會，雖二卿並行，止書一使，至於行師用兵，則並書諸將。」此書四卿，昭定之世，或書三卿，或書二卿，皆謂重兵故書之。其他國唯書元帥，詳內畧外也。夫用兵已屬不祥，今乃四卿悉出，全國皆虛，孔子惡之，故錄魯以舉例，所以重眾也。

十一 師眾與將帥

一 凡師重於將，即民重於官也。若君因惡將而並棄其師，是為夷狄，即不成為君矣。昔鄭伯素惡高克，欲去之無由，閔公二年，使將師救衛，後乃逐而不納。其本雖逐高克，春秋專舉棄師為重，書曰「鄭棄其師」，不言鄭伯，而曰鄭者，狄之也。說苑曰：「夫天之生人也，蓋非以為。」

君也。天之立君也。蓋非以為位也。夫為人君行其私欲而不顧其人。是不承天意。忘其位之所宜事也。如此者。春秋不予為君而夷狄之。鄭伯惡一人而兼棄其師。故有夷狄不君之辭。卷二此春秋重民之義也。

二 春秋之義。惟奉王命伐無禮。乃有戰事。故非義則不戰。其戰勝者。亦可以功言之也。然戰敗不曰敗功而曰敗績者。取其積聚師眾。有尊卑上下次第行伍。必出萬死而不奔北。故以自敗為文明。當坐喪師之罪也。凡敗績皆稱師。雖戰稱人時。其敗績亦稱師。重眾也。蓋戰時或不盡任戰事。故人數或少。而敗時無不奔敗。故人數必多。重人眾之被害。故重敗而稱稱師也。公羊傳注桓十三年。

三 凡舉師敗績為重眾。惟君獲君傷。當舉。獲君傷。君為重。無所取於言。師敗績。公羊傳僖公十五年。成公十六年。

四 凡用兵之道。宜自量。力倍則攻。敵則戰。少則守。穀梁傳僖公二十二年。若不得已。師少而戰。亦當使臣下往。君不自敵。公羊傳莊公

二十四年。

五 凡王者於用兵之將帥。暫不臣之。重士眾也。兵不可從。內御欲盛其威。一其令。使士卒一意。繫心於將。故但聞將軍令。不聞君命。進退在大夫也。春秋之義。兵不稱使。明不可臣也。百虎通。

六 凡遣將必於廟。示不敢自專也。制法度者祖。故於祖廟也。百虎通。若今日制法度者。民當遣於國會也。將

七 凡春秋書將者皆責元帥。為其興兵動眾。搆怨結禍。更相報償。流血無已也。隱公五年。公羊傳曰。將尊師眾。稱某率師。將尊師少。稱將。將卑師眾。稱師。將卑師少。稱人。君將不言率師。書其重者也。又宣公元年。春秋曰。楚子鄭人侵陳。遂侵宋。人者何微者也。微者不得言遂。遂者楚子之遂也。凡聯軍由尊者兼將。此所以責楚子也。凡兵以二千五百人為師。師者眾也。雖有累萬之眾。皆稱師也。滿此數以上為師眾。不滿為師少。大夫為尊。士為卑。分別之者。所以責元帥。因凡書兵者。皆以為不合於正道。故凡書將者。皆責元帥也。又所以著功惡之大小。即如將尊師眾而有功。則功小。將卑師少而有功。則功大。將卑師少而無功。則惡小。將尊師眾而無功。則惡大。是也。既謂責元

帥而仍有功惡之大小者。即孟子所謂彼善於此也。

荀子臨武君曰。請問為將。孫卿子曰。知莫大乎棄疑。行莫大乎無過。事莫大乎無悔。事至無悔而止矣。成不可必也。故制號政令。欲嚴以威。慶賞刑罰。欲必以信。處舍收藏。欲周以固。徙舉進退。欲安以重。欲疾以速。窺敵觀變。欲潛以深。欲伍以參。遇敵決戰。必道吾所明。無道吾所疑。夫是之謂六術。無欲將而惡廢。無急勝而忘敗。無威內而輕外。無見其利而不顧其害。凡慮事欲孰。而用財欲泰。夫是之謂五權。所以不受命於主有三。可殺而不可使處不完。可殺而不可使擊不勝。可殺而不可使欺百姓。夫是之謂三至。凡受命於主而行三軍。三軍既定。百官得序。羣物皆正。則主不能喜。敵不能怒。夫是之謂至臣。

慮必先事而申之以敬慎終如始終始如一夫是之謂大吉凡百事之成也必在敬之其敗也必在慢之故敬勝怠則吉怠勝敬則滅計勝欲則從欲勝計則凶戰如守行如戰有功如幸敬謀無壙敬事無壙敬吏無壙敬眾無壙敬敵無壙夫是之謂五無壙慎行此六術五權三至而處之以恭敬無壙夫是之謂天下之將則通於神明矣臨武君曰善荀子第十五

十二 賤詐

一 春秋之義貴信而賤詐詐人而勝之雖有功君子弗為也是以仲尼之門五尺之童子言羞稱五霸為其詐以成功苟為而已矣春秋繁露第三十二

二 凡出兵之時當正其名號指其所之不得行詐文公三年秋楚人圍江春秋於其冬書曰晉陽處父帥師楚代救江公羊傳曰此伐楚也其言救江何為諉也其為諉奈何伐楚為救江也蓋江遠楚近伐楚則其勢必當引圍江兵而還自救故意本救江而事則伐楚並不直言救江兵士但知意在伐楚而已是為用兵之詭計也孔子曰自古皆有民死無信不立故於為諉者惡之

三 凡用兵所以征不義不當為苟勝故陷阱奇伏之類皆不當用哀公九年春秋曰宋皇瑗帥師取鄭師于雍丘公羊傳曰其言取之何易也其易奈何詐之也哀公十三年春秋又曰春鄭軒達帥師取宋師于蟲公羊傳曰其言取之何易也其易奈何詐反也蓋前宋行詐

取鄭師。今鄭復行詐取之。苟相報償。不以君子正道。故傳言詐反。反猶報也。詐戰例月。今詐取不月者。蓋陷阱奇伏。又為詐之甚者。是以春秋深略之。並月而不書。所以甚疾之也。夫春秋全經言取師者止此二事。宋取鄭。鄭亦取宋。此以見循環之理。而兵之不可黷也。

四 凡託義而行惡。是為詐讓。不特無義。且坐其罪。昭公八年春。陳侯之弟招殺陳世子偃師。夏四月。陳哀公卒。楚靈王以招及孔瑗有謀弑之罪。因託辭討賊。而因以滅陳。春秋書之曰。冬十月壬午。楚師滅陳。執陳公子招。放之于越。殺陳孔瑗。葬陳哀公。滅例月。今日者。疾詐讓滅人也。春秋之義。舉滅為重。國滅^則其他不書。今復書放招殺瑗。葬公三事者。疾其詐讓託義。故列見之也。託義不先書者。本懷滅心。

故先著其滅陳之罪也。

襄公三十年。蔡世子般弑其君固而自立。是為蔡靈公。越十三年。至昭公十一年。楚靈王伏甲而饗蔡侯于申。醉而執殺之。乃遣兵圍蔡。春秋書曰。夏四月丁巳。楚子虔誘蔡侯般殺之于申。公羊傳曰。楚子虔何以名。絕。曷為絕之。為其誘討也。此討賊也。雖誘之。則曷為絕之。懷惡而討不義。君子不予也。蓋以靈王內懷利國之心。而外託討賊。故雖以弑父與君之賊。孔子亦不與其討之。反責其誘詐之不義也。是年春秋又書曰。冬十有一月丁酉。楚師滅蔡。執蔡世子有以歸。用之言執者。時楚託義滅之。故不舉滅為重。而復書其執用也。先書滅蔡者。起其本懷滅心也。日者亦疾其詐。譏滅人也。

十三 國內兵

一 春秋之義國內之兵不書蓋兄弟鬩于牆干戈動於邦內最為不祥之事不欲書之也且國內之兵不比國際之兵不足以言戰故不書也公羊傳注莊公十七年

二 凡國內叛邑當先以文德來之若不先之以德而便以兵圍之或以兵取之當與圍外邑或取外邑同罪得曰取不得曰圍凡叛邑而不言叛者為內諱也凡國內用兵雖伐叛亦為擾民故春秋罪之也此以見孔子之貴和平也公羊傳成公三年昭公元年二十六年三 凡諸侯不當親征叛邑蓋諸侯以國為家當全國盡服即有叛者亦宜秉綱執要命師征討若親自用兵則微弱益著更為可危也

公羊傳注定公十二年

四 凡無君命而在國內舉兵雖善事亦謂之叛定公十三年晉趙鞅取晉陽之甲以逐荀寅與士吉射荀寅與士吉射者君側之惡人也雖逐君側之惡人而春秋書之曰秋晉趙鞅入于晉陽以叛以其無君命也是故臣不奉君命雖善以叛言此春秋所以立臣道之大防固權之統一而免國內之兵爭也

十四 理藩

中國待藩屬之道最為寬大每不肯以藩屬之故而用兵常聽其自治不加干涉此原於孔教者也王制曰凡居民材必因天地寒暖燥濕廣谷大川異制民生其間者異俗剛柔輕重遲速異齊五味異和

器械異制衣服異宜修其教不_易俗齊其政不易其宜中國戎夷
五方之民皆有性也不可推移東方曰夷被髮文身有不火食者矣
南方曰蠻雕題交趾有不火食者矣西方曰戎被髮衣皮有不粒食
者矣北方曰狄衣羽毛穴居有不粒食者矣中國夷蠻戎狄皆有安
居和味宜服利用備器五方之民言語不通嗜欲不同達其志通其
欲東方曰寄南方曰象西方曰狄韞北方曰譯此孔子寬待藩屬之
制也雖復殖民通商而不易其俗不易其宜惟有傳布文明總攬主
權而已此所謂脩其教齊其政也

孔子四百十有四年閩越舉兵圍東甌東甌告急於漢時武帝即位
三年僅十九歲耳以問大尉田蚡蚡以為越人相攻擊其常事又數

反覆不足煩中國往救也。自秦時棄不屬，於是嚴助詰蚡曰：「特患力不能救，德不能覆，誠能何故棄之？」且秦舉咸陽而棄之，何但越也？今小國以窮困來告急，天子不振，尚安所愬？又何以子萬國乎？」武帝曰：「大尉不足與計。」吾新即位，不欲出虎符發兵郡國，乃遣助以節發兵會稽。蓋助會稽人也。遂發兵浮海救東甌，未至，閩越引兵罷，遂還師。後三年，即孔子四百十有七年，閩越復興，兵擊南越。南越守天子約，不敢擅發兵，而上書以聞。武帝多其義，遣兩將軍將兵誅閩越。淮南王安上書諫之，其書痛陳兵禍，力主和平。今特全錄之，以代表中國人崇尚和平，不因藩屬而用兵之意。其辭曰：

陛下臨天下，布德施惠，緩刑罰，薄賦歛，哀鰥寡，恤孤獨，養耆老，振匱

之盛德上隆。和澤下洽。近者親附。遠者懷德。天下攝然。人安其生。自
以身不見兵革。今聞有司舉兵將以誅越。臣安竊為陛下重之。越方
外之地。勸髮文身之民也。不可以冠帶之國法度理也。自三代之盛。
胡越不與受正朔。非彊弗能服。威弗能制也。以為不居之地。不收之
民。不足以煩中國也。故古者封內甸服。封外侯服。侯衛賓服。蠻夷要
服。戎狄荒服。遠近勢異也。自漢初定。已來七十二年。吳越人相攻擊。
者不可勝數。然天子未嘗舉兵而入其地也。臣聞越非有城郭邑里
也。處谿谷之間。篁竹之中。習於水鬪。便於用舟。地深昧而多水險。中
國之人不知其勢阻而入其地。雖百不當其一。得其地不可郡縣也。
攻之不可暴取也。以地圖察其山川要塞。相去不過寸數。而閒獨數

百千里阻險林叢弗能盡著視之若易行之甚難天下賴宗廟之靈
方內大寧戴白之老不見兵革民得夫婦相守父子相保陛下之德
也越人名為藩臣貢酎之奉不輸大內一卒之用不給上事自相攻
擊而陛下發兵救之是反以中國而勞蠻夷也且越人愚戇輕薄負
約反覆其不可用天子之法度非一日之積也壹不奉詔舉兵誅之
臣恐後兵革無時得息也

閒者數年歲比不登民待賣爵鬻子以接衣食賴陛下德澤振救之
得毋轉死溝壑四年不登五年復蝗民生未復今發兵徧行數千里
資衣糧入越地輿輜而踰領挖舟而入水行數百千里夾以深林叢
竹水道上下擊石林中多蝮蛇猛獸夏月暑時歐泄霍亂之病相隨

屬也曾未施兵接刃死傷者必眾矣前時南海王反陛下先臣使將
軍閒忌將兵擊之以其軍降處之上塗後復反會天暑多雨樓船卒
水居擊櫂未戰而疾死者過半親老涕泣孤子號號破家散業迎尸
千里之外裹骸骨而歸悲哀之氣數年不息長老至今以為記曾未
入其地而禍已至此矣臣聞軍旅之後必有凶年言民之各以其愁
苦之氣薄陰陽之和感天地之精而災氣為之生也陛下德配天地
明象日月恩至禽獸澤及草木一人有飢寒不終其天年而死者為
之悽愴於心今方內無狗吠之警而使陛下甲卒死亡暴露中原露
露山谷邊境之民為之早閉晏開晷不及夕臣安竊為陛下重之
不習南方地形者多以越為人眾兵彊能難邊城淮南全國之時多

為邊吏。臣竊聞之。與中國異。限以高山。人迹所絕。車道不通。天所以地隔外內也。其入中國。必下領水。領水之山峭峻。漂石破舟。不可以大船載食糧下也。越人欲為變。必先田餘干界中。積食糧。迺入伐材。治船。邊城守候誠謹。越人有入伐材者。輒收捕。焚其積聚。雖百越奈邊城何。且越人縣力薄材。不能陸戰。又無車騎弓弩之用。然而不可入者。以保地險。而中國之人不能其水土也。臣聞越甲卒不下數十萬。所以入之。五倍迺足。輓車奉饗者不在其中。南方暑溼。近夏瘴熱。暴露水居。蝮蛇蠱生。疾癘多作。兵未血刃。而病死者什二三。雖舉越國而虜之。不足以償所亡。

臣聞道路言閩越王弟甲弒而殺之。甲以誅死。其民未有所屬。陛下

若欲來內處之中國使重臣臨存施德垂賞以招致之此必携幼扶老以歸盛德聖若陛下無所用之則繼其絕世存其亡國建其王侯以為畜越此必委質為藩臣世共貢職陛下以方寸之印丈二之組填撫方外不勞一卒不頓一戟而威德並行

今以兵入其地此必震恐以有司為欲屠滅之也必雉兔逃入山林險阻背而去之則復相羣聚留而守之歷歲經年則士卒罷勸食糧乏絕男子不得耕稼種樹婦人不得紡績織紉丁壯從軍老弱轉餉居者無食行者無糧民苦兵事亡逃者必眾隨而誅之不可勝盡盜賊必起

臣聞長老言秦之時嘗使尉屠睢擊越又使監祿鑿渠通道越人逃

入深山林叢不可得攻留軍屯守空地曠日持久士卒勞倦越迺出
擊之秦兵大敗破迺發適戍以備之當此之時外內騷動百姓靡敝
行者不還往者莫反皆不聊生亡逃相從羣為盜賊於是山東之難
始興此老子所謂師之所處^棘擊生之者也兵者凶事一方有急四
面皆從臣恐變故之生姦邪之作由此始也周易曰高宗伐鬼方三
年而克之鬼方小蠻夷高宗殷之盛天子也以盛天子伐小蠻夷三
年而後克言用兵之不可不重也

臣聞天子之兵有征而無戰言莫敢校也如使越人蒙死徼幸以逆
執事之顏行廝輿之卒有一不備而歸者雖得越王之首臣猶竊為
大漢羞之陛下以四海為境九州為家八數為囿江海為池生民之

屬皆為臣妾人徒之眾足以奉千官之共租稅之收足以給乘輿之
御玩心神明東心執聖道負黼依馮玉几南面而聽斷號令天下四海
之內莫不嚮應陛下垂德惠以覆露之使元元之民安生樂業則澤
被萬世傳之子孫施之無窮天下之安猶泰山而四維之也夷狄之
地何足以為一日之間而煩汗馬之勞乎詩云王猶允塞徐方既來
言王道甚大而遠方懷之也臣聞之農夫勞而君子養焉愚者言而
智者擇焉臣安幸得為陛下守藩以身為鄣蔽人臣之任也邊境有
警愛身之死而不畢其愚非忠臣也臣安竊恐將吏之以十萬之師
為一使之任也漢書第六十四



卷第十九 戰律

一 總則

一 凡興兵戰伐圍攻者皆屬有罪。若無道之兵則於本罪加重。如哀公元年春秋曰：楚子陳侯隨侯許男圍蔡。是圍之罪不至貶爵也。若楚囊瓦既為無道，拘蔡昭公數年，乃復怒其歸，有怨言於定公四年，興師圍之。春秋以為罪重於圍，書曰：楚人圍蔡。不書囊瓦而貶稱人，明其罪之加重也。

二 春秋之例，戰不言伐，圍不言戰，入不言圍，滅不言入，書其重者也。猶律一人有數罪，以重者論之也。公羊傳：莊公十年，齊靈公於襄公十六年圍成，十七年又圍洮，圍防。春秋惡其亟伐，於十八年特加

諸侯同圍齊之文。蓋未圍齊而言圍齊。所以抑齊也。何注曰。加圍者。明當從滅死二等。奪其爵土。蓋用兵之道。滅為最甚。入次之。圍次之。今加言圍。輕於滅。入二等。明齊靈罪不合死。但合黜爵。滅土耳。然則滅人國者。絕罪。合死。入滅一等。當放逐。圍從死罪。滅二等。故盡奪爵。爵土矣。然則戰滅三等。當削地而降爵。如百里之侯。黜為七十里伯。是也。伐滅四等。當先削其地。如百里之侯。削為七十里侯。是也。此吾據白虎通以推補何注者也。

二 襲

凡輕行疾至。不戒以入。曰襲。蓋掩人不備。行不假途。人銜枚。馬繮勒。晝伏夜行。為襲也。白虎通。

凡越國襲人是為夷狄。僖公三十三年，春秋曰：晉人及姜戎敗秦于殽，其謂之秦何？夷狄之也。曷為夷狄之？秦穆公將襲鄭，百裏奚與蹇叔諫曰：「千里而襲人，未有不亡者也。」蓋行疾不假途塗，變必生，道遠多險阻，遭變必亡。穆公違諫出師，其後晉人與姜戎要之殽而擊之，匹馬隻輪無反者。孔子惡秦之行險襲人以棄其師，故狄之也。襄公二十三年，春秋曰：秋，齊侯伐衛，遂伐晉。冬，齊侯襲莒。左傳曰：齊侯還自晉，不入，遂襲莒，門于且于，傷股而退。書襲者，惡齊之以詐用師也。

三 侵

春秋之義，狎者曰侵。將兵至境，以其犯過而侵責之，服則引兵而去。

若水之浸物然。用意尚麤也。

春秋之例。侵者書時。乃莊公十年書曰。二月公侵宋。穀梁傳曰。侵時。此其月何也。乃深其怨于齊。又退侵宋以眾其敵。惡之故。謹而月之。公羊傳何注曰。月者。屬北敗彊齊之兵。南侵彊宋。南北有難。復連禍於大國。故危之。蓋莊公於是年正月已敗齊師于長勺。今二月又侵宋。兩月之間。而與兩大國搆兵。樹敵既眾。後患方長。故孔子危而惡之也。

定公六年。春秋曰。二月公侵鄭。何注曰。月者。內有彊臣之讎。不能討。而外結怨。故危之。八年。春秋曰。正月公侵齊。公至自侵齊。二月公侵齊。三月公至自侵齊。何注云。出入月者。內有彊臣之讎。外犯彊齊。再

出尤危於侵鄭。故知入亦當蒙上月。穀梁傳曰：公如往時致月，危致也。往月致時，危往也。往月致月，惡之也。蓋一時之間，再興兵革，往亦危，致亦危，故往月致月以惡之也。要之，凡侵人者，皆結怨鄰國，而危及己國之道也。故孔子惡之。

四 伐

春秋之義，精者曰伐。侵責之不服，推兵入境，伐擊之益深。用意稍精密也。春秋說題辭曰：伐人者，深入國內，行威有所斬壞，伐之為言敗之也。

春秋之義，惡人侵伐，故以伐人者為客，而抑之使居下，以見伐者為主，而揚之使居上。莊公二十八年，春秋曰：齊人伐衛，衛人及齊人戰。

先衛人以及齊人使衛主其事也。夫齊大衛小，曷為使衛主之？惡齊之伐人也。春秋繁露曰：會同之事，大者主小，戰伐之事，後者主先。苟不惡曷為使起之者居下？是其惡戰伐之辭已。第三蓋以常例言之。起兵伐人者，宜書在先而為主；被伐者，宜書在後而為客。今春秋反之，則以孔子惡戰伐也。

穀梁傳釋此經曰：戰則是師也，其曰人何也？微之也。何為微之也？今授之諸侯，而後有侵伐之事，故微之也。其人衛何也？以其人齊，不可不人衛也。范注云：齊桓始受方伯之任，未能信著鄰國，致有侵伐之事，貶師稱人以微之也。人不可以敵于師，師不可以與人戰，故亦以衛師為人，衛非有罪。

凡用兵之道當先至竟侵責之不服乃伐之其兵至之日不得即伐
莊公二十八年春秋三月甲寅齊人伐衛衛人及齊人戰衛人敗績
公羊傳曰伐不日此何以日至之日也戰不言伐此其言伐何至之
日也敗者稱師衛何以不稱師未得乎師也春秋伐例時今因齊人
於今日至便以今日伐之故特書甲寅之日且戰伐並書二者皆所
以著齊之暴也衛人以其至日便伐倉卒禦敵未得成列為師而敗
故春秋雖例應稱師而不稱所以惡齊之詐戰也
文公十五年春秋曰晉卻缺帥師伐蔡戊申入蔡公羊傳曰入不言
伐此其言伐何至之日也其日何至之日也蓋卻缺至日便伐亦至
日便入故兩貶之也

五 戰

一 凡合兵血刃曰戰。戰者憚警之也。尚書大傳

二 凡用兵之道以不戰而服人者為上。僖公四年春秋曰春王正月公會齊侯宋公陳侯衛侯鄭伯許男曹伯侵蔡。蔡潰遂伐楚。次于陘。夏楚屈完來盟于師。盟于召陵。穀梁傳曰潰之為言上下不相得也。侵淺事也。侵蔡而蔡潰以桓公為知所侵也。不土其地不分其民。明正也。遂繼事也。次止也。夫齊桓大集諸侯之師本以伐楚其侵蔡者亦為伐楚之故耳。然乃止陘不進者不欲以攻戰為事乃以俟屈完也。何休曰時楚強大卒暴征之則多傷士民。桓公先犯其與國臨蔡蔡潰兵精威行乃推以伐國。楚懼然使屈完來受盟修臣子之

職不頓兵血刃以文德優柔服之故詳錄其止次待之善其重愛民命生事有漸故敏則有功

三 凡對於兵力不敵者不當戰戰則殺傷太甚祇可驅逐之莊公三十年春秋曰齊人伐山戎公羊傳曰此蓋戰也何以不言戰春秋敵者言戰桓公之與戎狄驅之爾蓋春秋於兵力相敵者方以戰言之今山戎之力不敵齊桓但可驅逐而已故去戰以見力不平等之事所以貶桓公之多殺而惡其不仁也

四 凡起兵救鄰苟敵兵已解即當罷兵若猶與敵戰則春秋狄之昔楚莊王圍鄭晉荀林父帥師救之未至而楚已及鄭平晉師應退矣乃竟請戰於莊王而敗績春秋惡之以為所救已解而挑敵與戰

無服善之心而求上人故晉本中國而謂之夷狄楚本夷狄而謂之中國書曰晉荀林父帥師及楚子戰于邲晉師敗績不與晉之得與楚子為禮也

五 凡春秋書戰直者在^序上蓋以理之曲直為主不以大小强弱勝敗分也春秋以見伐者為主伐人者為客此常例也故主直則主序上如莊公二十八年齊伐衛衛人及齊人戰衛人敗績此直衛而以衛為主故以衛及齊也若客直則客序上如僖公十八年春宋公伐齊夏宋師及齊師戰于甌齊師敗績此直宋而以宋為主故以宋及齊也此變例也若主客兩曲則兩皆不與之為主而不言及如文公十二年晉人秦人戰于曲河是也

六 凡戰之道以偏戰為善偏者一面也結日定地各居一面鳴鼓而戰不相詐也偏戰者忿不加暴尚為彼善於此若詐戰則不結戰日出敵不意苟以求勝傷害實多故戰不如不戰而仍有所謂善戰偏戰善於詐戰也春秋之例戰書時偏戰書日詐戰書月公羊傳桓公十年僖公元年

七 凡戰之道祇當整旅決戰為將帥者不當棄師不用佻身獨鬪潛刃相害決勝負僖公元年春秋曰冬十月壬午公子友帥師敗莒師于麗獲莒挈穀梁傳曰內不言獲此其言獲何也惡公子之紹紹者奈何公子友謂莒挈曰吾二人不相說士卒何罪屏左右而相搏公子友處下左右曰孟勞孟勞者魯之寶刀也公子友以殺之然則

何以惡乎紹也。曰棄師之道也。蓋公友子以戰畢而勝負不分。故潛刃相紹。春秋既惡其紹。又惡其不顧師眾而僥倖於一逞。故曰棄師之道也。

八 凡用兵之道。不厄人。不鼓不成列。孔子前八十七年。為魯僖公二十二年。宋襄公與楚人期戰于泓水之北。楚人濟泓而來。有司復曰。請迨其未畢濟而擊之。宋公曰。不可。吾聞之也。君子不厄人。吾雖喪國之餘。寡人不忍行也。既濟未畢。陳有司復曰。請迨其未畢。陳而擊之。宋公曰。不可。吾聞之也。君子不鼓不成列。已陳然後襄公鼓之。宋師大敗。故春秋大之。書曰。冬十有一月己巳朔。宋公及楚人戰于泓。宋師敗績。夫偏戰者。日爾。此其言朔何。春秋辭繁而不殺者。正

也。所以大其不鼓不成列也。陸戰當舉地而乃言泓水。又所以大其不以水厄人也。公羊傳曰。臨大事而不忘大禮。有君而無臣。以為雖文王之戰。亦不過此也。此推崇之至者也。春秋繁露曰。故善宋襄公不凡人。不由其道而勝。不如由其道而敗。春秋貴之。將以變習俗而成王化也。(第十七)此孔子大宋襄之意。不過假宋襄以張義。固非以成敗論人者也。蓋重義不重事也。苟通此義。則一切陸戰海戰之公法。皆可本此以為原則矣。

九 凡侵伐者。當不斬祀。不殺厲。不獲二毛。祀者神位有屋樹者也。厲。疫病也。二毛。鬚髮斑白者也。孔子五十八年秋。吳侵陳。斬祀殺厲。師還出竟。陳大宰嚭使於師。夫差謂行人儀曰。是夫也多言。蓋嘗問

焉。師必有名。人之稱斯師也者。則謂之何。大宰嚭曰。古之侵伐者。不
斬祀。不殺厲。不獲二毛。今斯師也。殺厲。與其不謂之殺厲之師與。曰
反爾地。歸爾子。則謂之何。子謂所獲臣民也。曰。君王討敝邑之罪。又
矜而赦之。師與有無名乎。禮記檀弓。夫以吳王夫差之強暴。而斤斤
注意於師必有名。則春秋時之公法。稍顧名譽者。固不敢不懍遵之
矣。曰。不斬祀。則凡關於教化慈善之事。不得破壞矣。曰。不殺厲。則凡
負病受傷之兵。不得殺戮矣。曰。不獲二毛。則凡可尊可敬可矜可憐
之人。不得繫^係虜矣。而凡戰場外之不任戰事者。更不得無辜而被殺
被獲矣。此皆義之可推而見者也。

穀梁傳曰。古者不重創。不禽二毛。不重創者恤病也。不禽二毛者敬

老也。若重創禽二毛，則是乘人之傷病老弱以為利也。文公十一年，荀子臨武君曰：請問王者之軍制。孫卿子曰：將死鼓，御死轡，百吏死職，士大夫死行列，聞鼓聲而進，聞金聲而退，順命為上，有功次之。令不進而進，猶令不退而退也。其罪惟均，不殺老弱，不獵禾稼，服者不禽，格者不舍，斡命者不獲，凡誅非誅其百姓也，誅其亂百姓者也。百姓有扞其賊，則是亦賊也。以故順刃者生，蘇刃者死，斡命者貢，微子開封於宋，曹觸龍斷於軍，殷之服民，所以養生之者也。無異周人，故近者謳歌而樂之，遠者竭蹶而趨之，無幽間辟陋之國，莫不趨使而安樂之。四海之內，若一家，通達之屬，莫不從服。夫是之謂人師。詩曰：自東自西，自南自北，無思不服。此之謂也。王者有誅而無戰，城守不

攻兵格不擊。上下相喜則慶之。不屠城。不潛軍。不留眾。師不越時。故亂者樂其政。不安其上。欲其至也。臨武君曰善。第十五

司馬法曰。冢宰與百官布令于軍。曰。入罪人之地。無暴神祇。無行田獵。無毀土功。無燔牆屋。無伐林木。無取六畜禾黍器械。見其老幼。奉歸勿傷。雖遇壯者。不校勿敵。敵若傷之。醫藥歸之。第一淮南子兵略曰。故聞敵國之君。有加虐於民者。則舉兵而臨其境。責之以不義。刺之以過行。兵至其郊。乃令軍師曰。毋伐樹木。毋扶墳墓。毋刈五穀。毋焚積聚。毋捕民虜。毋收六畜。此皆中國古伐戰時國際法也。司馬遷曰。齊威王使大夫追論古者司馬兵法。而附穰苴於其中。因號曰司馬穰苴兵法。史記第六十四班固曰。淮南王安招致賓客方術之士。

數千人作為內書二十一篇。漢書第四十四故二書所言皆隆古之戰律也。敵若傷之。醫藥歸之。則凡因校敵而受傷者。不分彼己。皆歸之醫藥矣。此近世紅十字會之義也。

十 凡殺敵不可太甚。莊公三十年。春秋曰。齊人伐山戎。公羊傳曰。此齊侯也。其稱人何。貶曷為貶。子司馬子曰。蓋以剽之為已威矣。言齊桓迫殺之甚痛。故春秋惡其不仁也。

僖公三十三年。春秋曰。夏四月辛巳。晉人及姜戎敗秦于殽。公羊傳曰。詐戰不曰。此何以日。盡也。蓋晉人及姜戎要擊秦師。無一人得脫。至於匹馬隻輪無反者。故孔子惡晉之不仁而加日也。

十一 凡征伐不得用水火攻人。用則為大惡。孔子前一百五十四

年為魯桓公七年。春秋曰：春二月己亥，焚咸丘。公羊傳曰：焚之者何？樵之也。樵之者何？以火攻也。何言乎以火攻？疾始以火攻也。何注曰：征伐之道，不過用兵，服則可以退，不服則可以進。火之盛，炎水之盛，衝雖欲服罪，不可復禁，故疾其暴而不仁也。傳不託始者，前此未有無所託也。日者，重錄以火攻也。咸丘者，邾之邑也。其不言邾咸丘何也？欲使焚邑之罪與焚國同，故不繫於國，以通咸丘為國也。穀梁傳注：前此未有以火攻者，故春秋一遇咸丘之焚，即書以疾之，且去是年秋冬二時不書，以明其為大惡。後世殺人之術，日精，殺人之器，日利。凡一切殘暴不仁之事，有類於水火攻人者，當以此義正之矣。十二 凡用兵之道，戰不逐奔，敵兵既敗，宜縱之使生。宣公十二年。

楚莊王大敗晉師于泌水之南。晉眾奔走欲渡河而北。先入舟者斬後拔舟者指。指墮舟中。身隋泌水中而死。舟中之指可掬矣。莊王曰嘻。吾兩君不相好。百姓何罪。令之還師而佚晉寇。春秋大之。書曰晉荀林父帥師及楚子戰于泌。晉師敗績。陸戰當舉地而舉水者。大莊王閔隋水而佚晉寇。以是為王者之言也。穀梁傳曰。戰不逐奔。隱公五年即此義也。

孔子二十二年。楚工尹商陽與陳弃疾追吳師及之。陳弃疾謂工尹商陽曰。王事也。子手弓而可手弓。子射諸射之。斃一人。韞弓。又及。謂之又斃二人。每斃一人。揜其目。止其御。曰。朝不坐。燕不與。殺三人亦足以反命矣。孔子曰。殺人之中。又有禮焉。韞弓此戰不逐奔之義也。

禮朝燕於寢。大夫坐於上，士立於下。然則商陽與御者皆士也。商陽
仁而不忍傷人，弃疾以王事勸之，始殺一人，乃即韞弓不忍復射。再
勸而後斃二人，且每斃一人，即掩目不忍視之。又止御不復窮追。此
孔子所以善其合禮也。是故戰爭之道，以少殺為貴。此所謂殺人之
禮祖也。即戰時之公法也。

十三 凡降者自伏之文。公羊傳注莊公八年。

凡用兵之道，誅不殄服。穀梁傳隱公五年，誅者殺戮也。不殄服猶言
不殺降也。

甲 大戰

成公十六年六月。春秋曰：甲午晦，晉侯及楚子、鄭伯戰于鄢陵。楚子

鄭師敗績。公羊傳曰：敗者稱楚師，楚何以不稱師？王疾也。王疾者何？傷乎矢也。然則何以不言師敗績？末言爾，蓋舉傷君為重，無所取於言師敗績也。案此戰為晉楚兩國主兵，勢均力敵，實為大戰。茲謹摘錄左傳以見其戰時之雍容閑雅，雖殺敵致果之中，猶互行禮讓。苟後人推廣其意義，以為戰時公法，當亦不愧為文明國之交戰乎。

是年為孔子前二十四年。是年春，鄭叛，晉從楚。晉侯興師伐鄭，欒書將中軍，士燮佐之。卻錡將上軍，荀偃佐之。韓厥將下軍，卻至佐新軍。其卻犢為新軍之將，如衛如齊乞師。荀瑩為下軍之佐，居守。皆不在戰場。戊寅，四月十二日也。晉師起，鄭人聞有晉師，使告于楚。楚子救鄭，司馬子反將中軍，令尹子重將左，右尹子辛將右。五月，晉師濟河。

六月癸巳戰前之一日。月之二十八日也。潘尫之子黨與養由基蹲甲而射之。徹七札焉。以示楚王。曰。君有二臣如此。何憂於戰。王怒曰。大辱國。詰朝爾射死藝。

甲午晦。楚晨壓晉軍而陳。楚子登巢車以望晉軍。子重使太宰伯州犂侍于王後。伯州犂者晉人。於去年奔楚者也。王曰。騁而左右何也。曰。召軍吏也。皆聚於中軍矣。曰。合謀也。張幕矣。曰。度卜於先君也。徹幕矣。曰。將發命也。甚蹢且塵上矣。曰。將塞井夷竈而為行也。皆乘矣。左右執兵而下矣。曰。聽誓也。戰乎。曰。未可知也。乘而左右皆下矣。曰。戰禱也。伯州犂以公卒告王。苗賁皇者楚人也。於孔子前五十四年奔晉。在晉侯之側。亦以王卒告。晉人皆曰。國士在。且厚。不可當也。苗

賁皇言於晉侯曰。楚之良在其中軍王族而已。請分良以擊其左右。而三軍萃於王卒。必大敗之。公從之。有淖於前。乃皆左右相違於淖。步毅御晉厲公。欒鍼為右。彭名御楚共王。潘黨為右。石首御鄭成公。唐苟為右。欒范以其族夾公行。陷於淖。欒書將載晉侯。其子鍼曰。書退。國有大任焉。得專之。且侵官冒也。失官慢也。離局姦也。有三罪焉。不可犯也。乃掀公以出於淖。

卻至三遇楚子之卒。見楚子必下。免胄而趨風。蓋卻至於孔子前二十八年。嘗使楚也。楚子使工尹襄問之以弓。曰。方事之殷也。有韎韐之跗注。君子也。識見不穀而趨。無乃傷乎。卻至見客。免胄承命曰。君之外臣至。從寡君之戎事。以君之靈。間蒙甲冑。不敢拜命。敢告不寧。

君命之辱為事之故敢肅使者三肅使者而退

呂錡射共王中目王召養由基與之兩矢使射呂錡中項伏弋以一矢復命

晉韓厥從鄭伯其御杜溷羅曰速從之其御屢顧不在馬可及也韓厥曰不可以再辱國君乃止蓋韓厥於孔子前三十八年鞏之戰曾獲齊頃公而辱之也卻至從鄭伯其右蒯翰胡曰諜輅之余從之乘而俘以下卻至曰傷國君有刑亦止石首曰衛懿公唯不去其旗是以敗於熒乃納旌於弋中唐荀謂石首曰子在君側敗者壹大我不如子子以挽君我請止乃死

楚師薄於險叔山冉謂養由基曰雖君有命為國故子必射乃射再

發盡殪。叔山冉搏人以投。中軍折軾。晉師乃止。囚楚公子茂。

欒鍼見子重之旌。請曰。楚人謂夫旌子重之麾也。彼其子重也。日臣之使於楚也。子重問晉國之勇臣。對曰。好以眾整。曰。又何如。臣對曰。好以暇。今兩國治戎。行人不使。不可謂整。臨事而食言。不可謂暇。請攝飲焉。公許之。使行人執榼承飲。造于子重。曰。寡君乏使。使鍼御持矛。是以不得犒從者。使某攝飲。子重曰。夫子嘗與吾言於楚。必是故也。不亦識乎。受而飲之。免使者而復鼓。

旦而戰。見星未已。子反命軍吏察夷傷。補卒乘。繕甲兵。展車馬。雞鳴而食。唯命是聽。晉人患之。苗賁皇徇曰。蒐乘補卒。秣馬利兵。脩陳固列。蓐食申禱。明日復戰。乃逸楚囚。王聞之。召子反謀。穀陽豎獻飲於

子反子反醉而不能見王曰天敗楚也夫余不可以待乃宵遁晉入楚軍三日穀

乙 逃軍

凡輟戰而奔敵者為逃軍人臣之大罪也文公七年夏四月春秋曰戊子晉人及秦人戰于令狐晉先昧以師奔秦公羊傳曰此偏戰也何以不言師敗績敵也此晉先昧也其稱人何貶曷為貶外也其外奈何以師外也何以不言出遂在外也穀梁傳曰輟戰而奔秦以是為逃軍也

夫逃軍對於其本國固為不忠然對於患受逃之國未必無益即無益亦未必有損故交戰國有收受敵國逃軍之權利雖春秋亦不譏

之文公十年春秋曰夏伐晉何注曰謂之秦者起令狐之戰敵均不
敗晉先昧以師奔秦可以足矣而猶不知止故夷狄之據此則春秋
之狄秦乃責其不知止若夫先昧之奔秦正秦之所以為廢足之道
也春秋責其當以是而自足然則收受逃軍固春秋之所許矣

丙 間諜

考間諜之見於史傳者始於孔子紀元前一千五百二十八年夏少
康四十歲而中興使其臣女艾諜澆遂殺之而滅其過國因以復夏
之天下是也左傳哀公元年周禮夏官環人巡邦國搏諜賊又秋官
掌戮掌斬殺賊諜而膊之此皆古人治諜之刑也
凡間諜足以危害國家故殺戮間諜為正當之權利

孔子前五十年。晉師白狄伐秦。晉人獲秦謀。殺諸絳市。六日而蘇。左傳宣公八年。杜預以左傳之記此為記異。吾則取此為殺諜之證而已。至吾之存其六日而蘇四字而不削。所以廣異聞。明死而復生之事。世或有之。而耶蘇死後復活之事。雖有亦不足怪也。

孔子三十年。楚太子建遇讒奔宋。後遇宋亂出奔鄭。鄭人甚善之。又適晉。與晉人謀襲鄭。乃求復焉。鄭人復之如初。晉人使諜於建。請行而期焉。建暴虐於其私邑。邑人訴之。鄭人省之。得晉諜焉。遂殺建。時孔子三十三年也。左傳哀公十六年。

丁丁 俘虜

一 春秋之義。不許有俘虜。故宣公二年。穀梁傳曰。獲者不與之辭。

也。文公十一年傳又曰：然則何為不言獲也？曰：古者不重創，不禽二毛。故不言獲，為內諱也。此釋春秋叔孫得臣敗狄于鹹，不言獲而言敗之義也。僖公元年，公羊傳注亦曰：據獲人當坐。夫曰不與，曰當坐，曰為內諱，此皆不許有俘虜之義也。蓋重創禽二毛，皆為不仁。獲者亦重創禽二毛之屬也。故春秋不與之也。是故春秋於君傷而師敗者，舉君傷以包師敗；大夫傷而師敗者，舉師敗以包大夫傷。君獲而師敗者，舉君獲以包師敗；大夫獲而師敗者，敗獲並舉。此以見春秋之重獲而必書之也。

二 凡戰而擅獲國君者，當絕。蓋國君天子所建，代表一國。獲人君是上無天子，下無鄰國。故春秋之義，以獲人君為大惡也。公羊傳隱

公六年僖公十五年成公二年據此言之則國君尤不得為俘虜矣

三 凡待遇俘虜不當刻酷且當因其地位為相當之處置

孔子前一百三十三年魯莊公敗宋師于乘丘獲宋萬莊公歸散舍

諸宮中數月然後歸之歸反為大夫於宋後二年與閔公博婦人皆

在側萬曰甚矣魯侯之淑魯侯之美也天下諸侯宜為君者唯魯侯

耳閔公矜此婦人妒其言顧曰此虜也爾虜焉故魯侯之美惡乎至

萬怒搏閔公絕其脰公羊傳莊公十二年按宋萬為弑君之賊本無

足取惟其被獲于莊公散舍諸宮中數月必飽受優厚之待遇故兩

年之後情不能忘猶欣欣然極難歎莊公之美此雖有意訐閔公之

不如魯侯然苟非躬受厚待斷無以俘虜之故反歎美虜己之人此

可斷言者也。故吾特取此為當時優待俘虜之證。

孔子前三十三年。楚公子嬰齊伐鄭。晉景公帥諸侯救之。鄭人囚楚
鄭公鍾儀。獻諸晉。晉人以鍾儀歸。囚諸軍府。孔子前三十一年。晉侯
觀于軍府。見鍾儀。問之曰。南冠而縶者誰也。有司對曰。鄭人所獻楚
也。^因使稅之。召而弔之。再拜稽首。問其族。對曰。泠人也。公曰。能樂乎。對
曰。先父之職官也。敢有二事。使與之琴。操南音。公曰。君王何對^如曰。非
小人之所得知也。固問之。對曰。其為大子也。師保奉之以朝于嬰齊。
而夕于側也。不知其他。公語范文子。文子曰。楚囚君子也。言稱先職。
不背本也。樂操土風。不忘舊也。稱大子。抑無私也。名其二卿尊君也。
不背本。仁也。不忘舊。信也。無私。忠也。尊君。敏也。仁以接事。信以守之。

忠以成之。敏以行之。事雖大。必濟。君盍歸之。使合晉楚之成。公從之。
重為之禮。使歸求成。左傳成公九年

孔子前十一年。為魯襄公十一年。晉合諸侯伐鄭而服之。左傳曰。十
二月戊寅。會于蕭魚。庚辰。赦鄭囚。皆禮而歸之。然則歸囚之事。在會
後之二日耳。曰皆禮而歸之。則鄭囚為數甚眾。非一二人之比。故無
主名。殆普通俘虜也。然皆受禮歸之待遇。則可謂優矣。

四 凡用賄賂或威力及其他種種方法。使俘虜違背其盡忠本國
之義務。則為不義。俘虜即或勉強應命。其要約亦不得有效。孔子前
四十三年春。宋人以楚子自去年九月圍宋。乃告急於晉。晉景公自
知力不能救宋。然猶使解揚如宋。使無降楚。曰。晉師悉起。將至矣。鄭

人因而獻諸楚。楚子厚賂之，使反其言，不許。三而許而之，登諸樓車，使呼宋而告之，遂致其君命。楚子將殺之，使與之言曰：「爾既許不穀而反之，何故？」非我無信，女則弃之，速則爾刑。對曰：「臣聞之，君能制命為義，臣能承命為信。信載義而行之，為利謀不失利，以衛社稷，民之主也。義無二信，信無二命。君之賂臣，不知命也。受命以出，有死無貳。又可賂乎？」臣之許君，以成命也。死而成命，臣之祿也。寡君有信，臣下臣獲考死，又何求？」楚子舍之以歸。左傳宣公十五年

解揚之不辱君命，誠可謂舍生取義之烈士。然楚莊能自知其過，舍解揚以歸晉，亦寬大之賢君也。當時楚師未去宋，包圍尚在繼續中，而釋放解揚，並不附何等條件，此所謂單純釋放也。

五 凡敵國俘虜或未戰罷而歸之或戰罷而歸之皆可任俘虜國之自決若兩交戰國各有俘虜則互相交接亦情理之當然惟必斤斤計較於人數及品級之相等此則未免於市道非人道主義所當許也

孔子前七十六年晉襄公敗秦師于殽盡獲其三帥孟明視西乞術白乙丙以歸文嬴者襄公之母而秦穆公之女也請釋三帥曰彼實構吾二君寡君若得而食之不厭君何辱討焉使歸就戮于秦以逞寡君之志若何公許之先軫朝問秦囚公曰夫人請之吾舍之矣先軫怒曰武夫力而拘諸原婦人暫而免諸國墮軍實而長寇讎亡無日矣左傳襄公三十三年以事勢論之襄公釋秦三帥毫無條件致

其後秦屢興報復之師。原屬仁厚太過。然襄公以全勝之威。一旦而釋三帥之囚。實為仁義之舉動。彼秦國不知愧悔。報怨無已。春秋所以惡之也。

孔子前四十六年。晉楚戰于邲。晉師敗績而退。楚熊負羈囚晉知瑩。其父荀首時為下軍大夫。以其族反之。下軍之士多從之。首曰。不以人子。吾子其可得乎。吾不可以苟射也。射連尹襄老。獲之。遂載其尸。射公子穀。臣囚之。以二者還。及孔子前三十七年。晉人歸楚公子穀。臣與連尹襄老之尸於楚。以求知瑩。於是荀首佐中軍矣。故楚人許之。王送知瑩曰。子其怨我乎。對曰。二國治戎。臣不才。不勝其任。以為俘馘。執事不以釁鼓。使歸即戮。君之惠也。臣實不才。又誰敢怨。王曰。

然則德我乎。對曰：二國圖其社稷而求紓其民，各懲其忿以相宥也。
兩釋累囚以成其好，二國有^報好，臣不與及其誰敢德。王曰：子歸何以
振我。對曰：臣不任受怨，君亦不任受德，無怨無德，不知所報。王曰：雖
然，必告不穀。對曰：以君之靈，臣得歸骨於晉，寡君之以為戮死且不
朽。若從君之惠而免之，以賜君之外臣，首首其請於寡君，而以戮於
宗，亦死且不朽。若不獲命，而使嗣宗職，次及於事，而帥偏師以脩封
疆，雖遇執事，其弗敢違，其竭力致死，無有二心，以盡禮^且，所以報也。王
曰：晉未可與爭重，為之禮而歸之。（左傳成公三年）

晉楚兩釋累囚以成其好，所謂交換俘虜也。然晉以楚之一生一死，
易其一生人數，本不相等，品級亦未相當，乃晉猶為之，故交戰國誠

能各懲其忿以相宥原不必錙銖計較也此交換俘虜之義也若夫知螢之對楚子最為得體德怨兩忘無所容心於其間苟復任戰事則有死無二以報本國即所以報釋放之國此真俘虜自處之道矣六 俘虜亦有不待釋放而逃脫者晉荀螢之在楚也鄭賈人有將寘諸褚中以出既謀之未行而楚人歸之賈人如晉荀^螢人善視之如實出己以此觀之若使楚人不歸螢或亦自能逃出矣

七 古代俘虜亦有以贖而得釋者孔子前五十六年宋華元帥師及鄭公子歸生戰敗而被獲宋人以兵車百乘文馬百駟以贖華元于鄭是也左傳宣公二年

八 凡俘虜之有敵意者不可任以親近之職更不可使之挾持兵

器孔子八年為魯襄公二十九年左傳曰吳人伐越獲俘焉以為閭使守舟吳子餘祭觀舟閭以刀弑之此國君親近俘虜之戒也

戊 敵尸

凡死而被獲者當歸之於其本國孔子前七十六年僖公三十三年晉人敗敵狄于箕而晉先軫以嘗失禮於其君之故故意免曹入狄師而死狄人歸其元面如生此敗軍歸死者於勝軍也孔子前三十七年成公三年晉人歸楚公子穀臣與連尹襄老之尸于楚以求知罃此以生者及死者交換生者也孔子六十八年哀公十一年魯會吳伐齊大敗齊師獲國書魯使大史固歸國子之元於齊寘之新篋製之以玄纁加組帶焉寘書于其上曰天若不識不衷何以使下國言天

識不善。故殺國子也。此勝軍歸死者於敗軍也。觀此三事。則春秋之戰時國際法。其待遇死者。可謂有禮矣。左傳

孔子前四十六年。宣公十二年。楚子敗晉師于泌。泌潘黨請曰。君盍築武軍而收晉尸。以為京觀。臣聞克敵必示子孫。以無忘武功。楚子曰。非爾所知也。古者明王伐不敬。取其鯨鯢而封之。以為大戮。於是乎有京觀。以懲淫慝。今罪無所。而民皆盡忠。以死君命。又何以為京觀乎。左傳所言。則楚子固不收晉尸。以為京觀。然亦不詳其如何處置。以春秋戰國之習慣。法度之。其殆歸尸於晉歟。盡忠以死君命。此楚子所以嘉許死者也。晉罪無所犯。此孟子所以互謂敵國不相征而春秋無義戰也。第十四

甯越趙之中年人學十五歲而為周威王師漢志入之儒家呂氏春秋不廣篇曰齊攻廩丘趙使孔青將死士而救之與齊人戰大敗之齊將死車二千得尸三萬以為二京甯越謂孔青曰惜矣不如歸尸以內攻之越聞之古善戰者蒞隨賁服卻舍延尸彼得尸而財費乏車甲盡於戰府庫盡於葬此之謂內攻之孔青曰敵齊不尸則如何甯越曰戰而不勝其罪一與人出而不與人入其罪二與之尸而弗取其罪三民以此三者怨上上無以使下下無以事上是之謂重攻之甯越可謂知重用文武矣用武則以力勝用文則以德勝文武盡勝何敵之不服

卷十五蓋歸尸於敵者以德勝人者也

六 入

一 凡入者以兵入也。已得其國而不居曰入。春秋書法入例時傷害多則月。隱公二年夏五月莒人入向是也。其國被滅而仍言入者諱文耳。閔公二年狄入衛。為齊桓諱衛之滅也。哀公八年宋公入曹。為魯諱曹之滅也。

二 凡兵入境而淫亂。春秋狄之僖公三十三年春王二月秦人入滑。其後春秋書曰夏四月辛巳晉人及姜戎敗秦師于殽。穀梁傳曰不言戰而言敗何也。狄秦也。其狄之何也。秦越千里之險入虛國。進不能守。退敗其師。徒亂人子女之教。無男女之別。秦之為狄。自殺之戰始也。蓋謂入滑之時縱暴亂也。

定公四年春秋曰庚辰吳入楚穀梁傳曰何以謂之吳也狄之也何謂狄之也君居其君之寢而妻其君之妻大夫居其大夫之寢而妻其大夫之妻蓋有欲妻楚王之母者不正乘敗人之績而深為利居人之國故反其狄道也且春秋之義入例書時傷害多則月今此書日此亦所以惡其不義也

三 凡敵人服罪則當舍之孔子前四十六年為魯宣公十二年楚莊王伐鄭勝乎皇門放乎路衢鄭伯肉袒左執茅旌右執鸞刀以迎莊國王舉國降服莊王乃退軍七里而許之平將軍子重諫曰南郢之與鄭相去數千里諸大夫死者數人廝役扈養死者數百人今君勝鄭而不有無乃失民臣之力乎莊王曰古者杆不穿皮不蠹則不

出于四方。是以君子篤於禮而薄於利。要其人而不要其土。告從不
赦。不詳。遂舍之。春秋以為莊王之舍鄭有可貴之美。故於^鄭之戰。稱
楚子以褒之也。

孔子四年。為魯襄公二十五年。六月。鄭子展子產帥師入陳。子展命
師無入公宮。與子產親御諸門。陳侯使司馬桓子賂以宗器。陳侯免
擁社。使其眾男女別而纍。以待於朝。子展執紼而見。再拜稽首。承飲
而進獻。子產入。數俘而出。祝祓社。司徒致民。司馬致節。司空致地。乃
還。左傳此亦得國而不有之事也。命師無入公宮。兩將親御諸門。則
雖敵人國有財產。亦秋毫無犯也。再拜稽首。承飲進獻。則雖對降服
之君。猶盡臣禮也。數俘而出。則不以俘虜歸也。致民節地而還。則是

正其眾官使各脩其職而已毫無所利也

孟子齊人伐燕取之諸侯將謀救燕宣王曰諸侯多謀伐寡人者何以待之孟子曰今燕虐其民王往而征之民以為將拯己於水火之中也簞食壺漿以迎王師若殺其父兄係累其子弟毀其宗廟遷其重器如之何其可也天下固畏齊之強也今又倍地而不行仁政是動天下之兵也王速出令反其旄倪止其重器謀於燕衆置君而後去之則猶可及止也第二如孟子之言則勝敵者不得殺其父兄係累其子弟毀其宗廟遷其重器矣蓋伐罪弔民不因以為利孔教之道也

卷第二十 夷狄

一 中國夷狄之界說

春秋之義有禮義者謂之中國無禮義者謂之夷狄夷狄而進於中國則中國之及其反夷狄則夷狄之中國而夷狄亦夷狄之無通辭也是故中國與夷狄均無定名亦無人種與地理之分惟以禮義為標準而孔子之所謂中國夷狄者猶今日所謂文明野蠻也此乃文化之符號而非國界種界之區別也

二 外夷狄

一 春秋之義內其國而外諸夏內諸夏而外夷狄王者欲一乎天下曷為以外內之辭言言自近者始也明當先正京師乃正諸夏諸

夏正乃正夷狄以漸治之也故葉公問政於孔子孔子曰近者說遠者來公羊傳成公十五年論語第十三

二 凡夷狄不當與之交婚僖公聘楚女為嫡故春秋於僖公元年進楚稱人使若中國以諱之

三 凡王者草創之時不治夷狄雖有罪不暇治之來者勿拒去者勿追而已故待以客禮讓而不臣以其來服荒忽無常也公羊傳注

隱公二年漢第書九十四下

四 凡中國者禮義之國也夷狄無禮義者也孔子不使無禮義制治有禮義故不與夷狄之執中國夫執中國尚不可况執天子之使犯上甚矣此春秋所以於隱公七年書戎伐凡伯于楚丘以歸也凡

伯者天子之大夫出使者也。為我所執。春秋不與夷狄之執中國。故變執言伐。所以尊天子降夷狄也。春秋之京法。以京師治諸夏。以諸夏治夷狄。此遠近中外之差次也。楚上地不接京師。故以中國正之。僖公二十一年。楚子執宋公。以伐宋。春秋不言楚子執之。亦不與夷狄之執中國也。

五 凡夷狄而犯中國。春秋貶之。如僖公十八年。狄已進。稱人。至二十一年。則書曰。春。狄侵衛。為犯中國而貶之也。

六 春秋之義。以夷言伐而不得言戰。避大夷也。大夷言戰而不得言獲。避中國也。中國言獲而不得言執。避天子也。春秋繁露第五。

七 春秋之義。中國與夷狄不言戰。皆曰敗之。成公十二年。秋。晉人

敗狄于交剛是也。又中國敗夷狄及夷狄自相敗皆不書日外之而畧之也。穀梁傳

八 春秋之義中國不言敗。雖夷狄敗中國而言敗復言戰不直言敗與中國相敗者同文。宣公十二年晉荀林父帥師及楚子戰于邲。晉師敗績是也。若敗而見獲則雖中國亦言敗所以著其獲也。獲而不言獲者不與夷狄之獲中國也。莊公十年秋九月荊敗蔡師于莘以蔡侯獻舞歸是也。穀梁傳公羊傳

九 凡夷狄相戰春秋畧之。昭公十七年楚人及吳戰于長岸不書其月是也。

十 凡夷狄相滅春秋畧之。昭公十三年吳滅州來春秋不書其月。

是也。

十一 凡夷狄相誘殺春秋畧之。昭公十六年春秋曰。楚子誘戎曼子殺之。公羊傳曰。楚子何以不名。夷狄相誘。君子不疾也。曷為不疾。若不疾乃疾之也。蓋以為固當常然者。乃所以為惡也。顧以為無知而薄責之。

十二 凡夷狄誘殺中國則春秋謹之又謹而書之。昭公十一年春秋曰。夏四月丁巳。楚子虔誘蔡侯般殺之于申。諸侯不生名。楚子虔何以名。穀梁傳曰。何為名之也。夷狄之君誘中國之君而殺之。故謹而名之也。稱時稱月稱日稱地謹之也。蓋此經不專以誘殺起義。其謹名以為特文。又謹時謹月謹日謹地以盈其文。乃全以夷狄誘殺

中國起義。若中國誘殺中國。無為謹之又謹如是也。中國誘殺夷狄。亦無為謹之又謹如是也。夷狄誘殺夷狄。則更有楚子誘殺戎曼子。而不書名之明文矣。此華夷之別也。

三 攘夷狄

一 凡禦戎之道。當於其未至而豫禦之。不獨為本國除害。並當為文明各國豫除戎害。莊公十八年。春秋曰。夏公追戎于濟西。公羊傳曰。此未有伐者。其言追何。^大其為中國追也。此未有伐中國者。則其言為中國追何。大其未至而豫禦之也。其言于濟西何。大之也。蓋大莊公能為華夏各國除害。恩及濟西也。言大者。於王法當有功賞也。凡追例書時。

二 凡禦夷之道時戰則戰時守則守時逐則逐或謂僅以驅逐為

事或謂僅以防守為事皆囿於一偏之見者也周宣公王時玁狁至

于涇陽距京師不過二三百里故尹吉甫以六月盛暑出師驅逐出

境至于千里之太原蓋初度用兵先救眉急且兵力未盛故盡境而

還不戰不守此驅逐之效也采薇之詩我戍未定靡使歸聘守也豈

敢定居一月三捷戰也蓋三捷者三有勝功謂侵也伐也戰也此攻

守迭用之效也及三度用兵出車之詩曰王命南仲城彼朔_方則扼要

駐防以守為主矣然執訊獲醜亦不廢戰也蓋善用兵者以戰為守

以守為戰不可執一而論特其歸以守為本耳

三 凡數夷交侵宜特注重其强大者故出車之詩雖一言薄伐西

戎而兩言獫狁于曩獫狁于夷別輕重也。又采芑之詩言征伐獫狁蠻荆來威先所重也。蓋惟先專力於強大故強大平而弱小自附嚮使先伐弱小則徒消耗兵力耳。弱小縱平彼強大豈遂服哉。

四 凡夷狄之能為中國患者雖殺其一人跡為大功文公十一年春秋曰冬

十月甲午叔孫得臣敗狄于鹹。公羊傳曰狄者何長狄也其言敗何大之也其日何大之也其地何大之也。穀梁傳曰不言帥師而言敗何也直敗一人之辭也一人而曰敗何也以眾焉言之也。蓋長狄是異人其身甚長或以為長百尺或以為長五丈四尺欲在中國為君非一人所能討興師動眾然後殺之如大戰然也。

五 凡戎狄無義若其師眾疆則其君不當自敵。公羊傳莊公二十四

年

六 凡夷狄侵伐諸夏不論何國諸夏當雜然往救之莊公二十八年春秋曰秋荆伐鄭公會齊人宋人邾婁人救鄭書者善中國能相救也

七 凡諸侯同盟以同禦夷者春秋善之文公十四年春秋曰六月公會宋公陳侯衛侯鄭伯許男曹伯晉趙盾癸酉同盟于新城穀梁傳曰同者有同也同外楚也

八 凡諸侯同盟以備強夷者當信義相守有夷難則救之不當侵犯同盟成公五年十二月諸侯盟于蟲牢鄭既服而約備楚也乃明年秋楚師伐鄭而諸侯不能救是年冬晉反侵之故春秋深為中國

諱不書鄭伯費之葬

成公九年正月春秋曰公會晉侯齊侯宋公衛侯鄭伯曹伯莒子杞伯同盟于蒲何注曰不日者已得鄭盟當以備楚而不以罪執之旋使離叛楚緣隙潰莒不能救禍由中國無信故諱為信辭使若莒潰非盟失信所以甚中國因與下潰日相起是年秋七月春秋曰晉人執鄭伯冬十有一月又曰楚公子嬰齊帥師伐莒庚申莒潰何注曰日者錄責中國無信同盟不能相救至為夷狄所潰

九 凡德服強夷最為盛功僖公四年春齊桓公以諸侯之師侵蔡蔡潰遂伐楚次于陟夏楚子使屈完來盟春秋書之曰楚屈完來盟于師盟于召陵公羊傳曰屈完者何楚大夫也何以不稱使尊屈完

也。曷為尊屈完以當桓公也。其言盟于師盟于召陵何。師在召陵也。師在召陵曷為再言盟。喜服楚也。何言乎喜服楚。楚有王者則後服。無王者則先叛。夷狄也而亟病中國。南夷與北狄交。中國不絕若綫。桓公救中國而攘夷狄。卒^剗恤服。以此為王者之事也。其言來何。與桓為主也。前此者有事矣。後此者有事矣。則曷為獨於此焉。與桓公為主序績也。

僖公二十八年。春秋曰。夏四月己巳。晉侯齊師宋師秦師及楚人戰于城濮。楚師敗績。楚殺其大夫得臣。秦比戎狄。今稱師者。助霸者征伐。克勝有功。故褒進之也。楚人者。子玉得臣也。不使大夫得敵君。故人之也。楚無大夫。今言殺其大夫者。欲起上。楚人本當言子玉得

臣所以詳錄霸事也不氏者子玉得臣楚之驕蹇臣數道其君侵中國故貶之明當與君俱治也

齊桓晉文為春秋二伯故孟子曰其事則齊桓晉文第八桓文之事功可謂盛矣然皆以服楚為最蓋不攘夷狄無以救中國也桓以德服文以力勝皆順乎時勢之當然而不能軒輊者也

十 凡夷狄能為中國攘夷者春秋大之定公四年春魯十有一月庚

午蔡侯以吳子及楚人戰于伯莒楚師敗績公羊傳曰吳何以稱子夷狄也而憂中國穀梁傳曰吳信中國而攘夷狄吳進矣蓋吳之敗楚本其素志而是役特以救蔡而起故春秋善之惡楚而進吳也楚自能態通僭號凌轢諸夏二百餘年雖齊桓晉文亦不過小挫其鋒吳

乃能假救蔡之義入其都而滅其國實足以張王法雖其志不必尊王春秋即攘夷以大之亦重義不重事之意也

十一 凡有攘夷之心者雖並不能攘春秋猶褒之定公四年春秋曰三月公會劉子晉侯宋公蔡侯衛侯陳子鄭伯許男曹伯莒子邾婁子頓子胡子滕子薛伯杞伯小邾婁子齊國夏于召陵侵楚其下又曰五月公及諸侯盟于浩油何注曰後楚復圍蔡不救不日者善諸侯翕然俱有疾楚之心會同最盛故褒與信辭

十二 凡對於夷狄當一視同仁不當欺其弱小而迫殺之莊公三十年春秋曰齊人伐山戎不曰齊侯而曰齊人又不言戰所以惡桓公之不仁也蓋孔子以為戎狄亦天地所生其生命較之中國人並

無分貴賤且兵力不敵尤不當與之戰此平等博愛柔服遠人之義也近世強凌弱眾暴寡虐待土番及半開之民族者當以此義正之十三攘夷者非專殺之逐之也故以和戎終焉和戎之利最先發明者為魏絳襄公四年無終子嘉父使孟樂如晉因魏絳納虎豹之皮以諸請和諸戎晉侯曰戎狄無親而貪不如伐之魏絳曰諸侯新服陳新來和將觀於我我德則睦否則攜貳勞師於戎而楚伐陳必弗能救是棄陳也諸華必叛戎禽獸也獲戎失華無乃不可乎於是絳詳述后羿之事以告蓋絳以戎比禽獸不欲晉侯獲戎失華致與后羿因好獸而失國相似且欲藉是以規晉侯之好異田也後絳復曰和戎有五利焉戎狄荐居貴貨易土土可賈焉一也邊鄙不聳民

狎其野。穡人成功。二也。戎狄事晉。四鄰振動。諸侯威懷。三也。以德綏我師。徒不勤。甲兵不頓。四年也。鑒于后羿。而用德度。遠至邇安。五安也。君其圖之。公說。使魏絳盟諸戎。脩民事。田以時。襄公十一年。晉侯以樂賜絳。曰。子教寡人和諸戎狄。以正諸華。公八年之中。九合諸侯。如樂之和。無所不諧。請與子樂之。此魏絳和戎之效也。左傳與後世和親之策異矣。

四 背夏即夷

一 凡雖參與中國之會盟。而政意於夷狄者。春秋刺之。僖公二十八年。春秋曰。五月癸丑。公會晉侯。齊侯。宋公。蔡侯。鄭伯。衛子。莒子。盟于踐土。陳侯如會。其言如會者。後會也。刺陳侯不慕霸者。反政意于

楚失信後會也。

二 凡雖參與中國之會盟而中道逃去者春秋抑之僖公五年夏春秋曰公及齊侯宋公陳侯衛侯鄭伯許男曹伯會王世子于首戴秋八月諸侯盟于首戴鄭伯逃歸不盟穀梁傳曰以其去諸侯故逃之也故明年夏諸侯伐鄭圍新城傳曰病鄭也著鄭伯之罪也冬公至自伐鄭傳又曰大伐鄭也又襄公七年春秋曰十有二月公會晉侯宋公陳侯衛侯曹伯呂子邾婁子于鄰陳侯已在會矣其後春秋復曰陳侯逃歸穀梁傳亦釋之曰以其去諸侯故逃之也蓋背華即夷故書逃以抑之也孔子曰夷狄之有君不如諸夏之亡不當背也

三 凡背夏與夷春秋抑之僖公八年春秋曰春王正月公會王人齊侯宋公衛侯許男曹伯陳世子款盟于洮鄭伯乞盟公羊傳曰乞盟者何處其所而處與也其處其所而請與奈何蓋酌之也何注曰時鄭伯欲與楚不肯自來盟處其國遣使挹取其血而請與之約束無汲汲慕中國之心故抑之使若叩頭乞盟者也不錄使者方抑鄭伯使若自來也

四 凡背中國而與夷狄春秋賤之僖公十四年冬蔡侯肸卒春秋不書其月賤其背中國而附父讎故略之甚也蓋肸之父獻舞莊公十年為楚所獲而卒於楚是楚為蔡之父讎也又昭公二十三年春秋曰夏六月蔡侯東國卒于楚何注曰不日者惡背中國而與楚故

畧之月者。比盱附父讎責之淺也。然則盱過深。故不月。東國過淺。故但不日而已。

五 凡首先棄夏即夷者。春秋賤而略之。晉文沒後。蔡最先背中國而與楚。文公十年。楚子蔡侯次于屈貉是也。故春秋於宣公十七年葬蔡文公。不書其月以略之。

六 凡首與夷狄會盟。致夷狄得中國者。春秋抑之。僖公十九年以前。楚未嘗與中國會盟。至是年。春秋始書曰。冬公會陳人蔡人楚人鄭人盟于齊。因宋征齊有隙。為此盟也。是後楚遂得中國。僖公二十一年。春。宋人齊人楚人盟于鹿上。秋。宋公楚子陳侯蔡侯鄭伯許男曹伯會于霍。執宋公以伐宋是也。夫以齊讎宋。以德為怨。既屬不合。

復致楚得諸夏則齊之罪大矣春秋於陳蔡楚鄭四國皆稱人而猶書公會明其皆諸侯而非人也非人而人之者抑之也書公所以責公也又稱人者亦所以諱之也若曰與微者盟爾深為公諱使若楚得中國之事非齊盟所致也

七 凡信夷狄而伐中國者春秋貶之僖公二十七年春秋曰冬楚人陳侯蔡侯鄭伯許男圍宋穀梁傳曰楚人者楚子也其曰人何也人楚子所以人諸侯也其人諸侯何也不正其信夷狄而伐中國也蓋楚為夷狄宋為中國諸侯隨楚圍宋是為信夷屈華不義之甚貶楚子於兵首則諸侯之被貶以類見矣

八 凡黨夷伐夏者春秋狄之成公三年春秋曰鄭伐許何注曰謂

之鄭者。惡鄭襄公與楚同心。數侵伐諸夏。自此之後。中國盟會無已。兵革數起。夷狄比周為黨。故夷狄之蓋鄭。自宣公十二年後。敗晉圍宋。執解揚。致諸夏弱。蠻荆強。皆鄭為之也。

九 凡道夷滅夏。或從夷滅夏者。春秋皆疾之。襄公十年。春秋曰。春。公會晉侯。宋公。衛侯。曹伯。莒子。邾婁子。滕子。薛伯。杞伯。小邾婁子。齊世子光。會吳于柤。夏五月甲午。遂滅偃陽。公至自會。公羊何注曰。滅日者。甚惡諸侯不崇禮義以相安。反遂為不仁。開道彊夷滅中國。中國之禍連蔓日及。故疾錄之。滅比于取邑。例不當書。致書致者。深諱。使若公與上會不與下滅。

穀梁傳釋此經曰。會又會外之也。其日遂何也。不以中國從夷狄也。

會夷狄不致惡事不致此其致何也存中國也中國有善事則并焉
無善事則異之存之也汲鄭伯逃歸陳侯襄公七年致祖之會存中
國也按何注以為開道彊夷滅中國穀梁傳以為從夷狄而滅中國
雖有首從之分然其不合於春秋之義則一也春秋之義內諸夏而
外夷狄故殊會吳以外之又小以中國從夷狄而日其遂所謂無善
事則外之異使若會與遂異人所以存中國也若如僖公四年諸侯侵
蔡蔡潰遂伐楚則言遂而不言日所謂有善事則并焉也此既是會
夷狄又是惡事本不當致然猶致之者特為存中國之文使若未嘗
會吳未嘗滅偃陽也此春秋夷夏之辨也

十 凡以京師待夷狄者當誅哀公四年春秋曰晉人執戎曼子赤

歸于楚赤者戎曼子之名也。楚自以為盛大于中國，帝制自為，以京師自待，乃晉為中國之霸伯，竟無天子之命，而擅執人君，已屬不合。又歸之于楚，是為楚執也。晉為楚執人之君，是天子楚也，是背叛天子也。此春秋所以誅晉也。

十一 春秋之義，不與夷狄主中國。若君事夷狄，尤屬可惡。昭公二十三年，雞父之戰，哀公十一年，艾陵之戰，吳雖能結日偏戰，戰而春秋一則以詐戰之辭言之，曰戊辰吳敗頓胡沈蔡陳許之師于雞父。胡子髡，沈子楹滅，獲陳夏齧。一則以齊國書序于吳上，曰甲戌齊國書帥師及吳戰于艾陵，齊師敗績，獲齊國書，皆不與夷狄之主中國也。夫吳能結日偏戰，其行少進，春秋既從中國辭言之，而書獲矣，乃

猶不與之為主。是可知夷狄縱能用中國之禮。孔子終不許之主中國矣。穀梁傳曰。春秋之義。用貴治賤。用賢治不肖。不以亂治亂也。昭公四年。故以夷狄主中國。無時而可者也。

哀公十三年夏。春秋曰。公會晉侯及吳子于黃池。公羊傳曰。吳何以稱子。吳主會也。吳主會則曷為先言晉侯。不與夷狄之主中國也。其言及吳子何。會兩伯之辭也。不與夷狄之主中國。則曷為以會兩伯之辭言之。重吳也。曷為重吳。吳在是。則天下諸侯莫敢不至也。何注曰。時吳彊而無道。敗齊臨晉。乘勝大會中國。齊晉前驅。魯衛驂乘。滕薛俠轂而趨。以諸夏之眾。冠帶之國。反背天子而事夷狄。耻甚。不可忍言。故深為諱辭。使若吳大以禮義會天下諸侯。以尊事天子。故進

稱子主書者惡諸侯君事夷狄蓋黃池之會一則見吳之強暴一則見晉之衰微然春秋尤以惡諸侯君事夷狄為主若非諸侯之無耻則吳之彊暴必不至是晉之衰微亦必不至是也且中國雖衰弱夷狄雖強暴豈可遂君事之乎嗚呼此孔子所以深責諸夏也夫哀公之世文致太平所謂夷狄進至於爵天下遠近小大若一者然猶抑吳於晉下且其爵不過稱子是則雖在太平之世大同之局中國固常為中國自主之中國萬不能使夷狄主之蓋所謂大同者乃夷狄同化於中國之謂非中國同化於夷狄之謂所謂用夏變夷未有用夷變夏者也嗚呼孔教之所謂太平大同者乃中國之化進而益上化被無外治及四夷而夷狄亦能去俗歸義悉在中國之化內耳豈

中國退而與夷狄同等甚或反為夷狄所治者乎若如是則退化而非進化衰亂而非太平矣豈春秋之義也哉自號為禮義之國者當知所以自處矣

五 去夏夷歸夏

一 凡夷狄與國背夷附夏共結和親則春秋喜之襄公三年春秋曰六月公會單子晉侯宋公衛侯鄭伯莒子邾婁子齊世子光己未同盟于雞澤陳侯使袁僑如會戊寅叔孫豹及諸侯之大夫及陳袁僑盟公羊傳曰其言如會何後會也曷為殊及陳袁僑為其與袁僑盟也何注曰陳鄭楚之與國陳侯有慕中國之心有疾使大夫會諸侯欲附䟽不復備責遂與之盟共結和親故殊之起主為與袁僑盟

也。復出陳者，喜得陳國也。蓋楚人強盛，諸夏微弱，陳侯背楚，故喜得之。所以奪夷狄之勢，蓋諸夏之榮也。

二 凡親附中國者，雖有志未達，而春秋必成其美而賢之。襄公七年，春秋曰：「十有二月，公會晉侯、宋公、陳侯、衛侯、曹伯、莒子、邾子于鄆。」鄭伯髡原如會，未見諸侯，丙戌卒于操。穀梁傳曰：「未見諸侯，其曰如會何也？致其志也。禮，諸侯不生名，此其生名何也？卒之名也。卒之名，則何為加之如會之上？見以如會卒也。其見以如會卒何也？鄭伯將會中國，其臣欲從楚，不勝其臣，弑而死，其不言弑何也？不使夷狄之民加乎中國之君也。其地於外也。其曰未踰竟也。日卒時葬，正也。蓋與中國為賢，故事雖未成，而春秋達其意，背中國為惡，故鄭國大夫

而春秋貶為夷狄之民。

三 凡夷狄與國屢伐不服。後卒背夷附夏，共結和親。春秋以為難得，尤喜而詳錄之。襄公十一年秋，春秋曰：公會晉侯、宋公、衛侯、曹伯、齊世子光、莒子邾婁子滕子、薛伯、杞伯、小邾婁子伐鄭。會于蕭魚。公至自會。公羊傳曰：此伐鄭也。其言會于蕭魚何？蓋鄭與會爾。穀梁傳曰：伐而後會，不以伐鄭致得鄭伯之辭也。蓋鄭為楚與國，中國之服鄭最難。三年之中，五起兵革。襄公九年冬，諸侯伐鄭而同盟于戲。一也。十年秋，又伐鄭。二也。各戍鄭虎牢。三也。本年夏，又伐鄭。至秋七月，而同盟于京城北。四也。通此則五矣。鄭服之後，中國不復伐鄭，無干戈之患二十餘年。故孔子喜而詳錄其會，以得鄭為重也。春秋從是

年楚人執鄭行人良霄。至三十年鄭人殺良霄。二十年中鄭大夫皆特書名氏。蓋深喜鄭之一意中國而鄭大夫之得會於諸侯也。

四 凡夷狄與國背夷狄而攻其與國者。春秋以為當助之。所以孤離夷狄之勢而弱其與國也。襄公二十五年春秋曰。六月壬子鄭公孫舍之帥師入陳。何注曰。日者陳鄭俱楚之與國。今鄭背楚入陳。明中國當憂助鄭。以離楚弱陳。故為中國憂錄之。蓋入例時。傷害多則月。而今書日。所以明強華弱夷之義也。

六 狄中國

一 凡春秋常辭。夷狄不得與中國為禮。若夷狄變而為君子。中國變而為夷狄。則移其辭以從其事。中國反不得與夷狄為禮。此以見

孔子之所謂中國夷狄者。不以種別。不以地別。不以國別。惟以文化之淺深為別。又不以全體而概論之。而惟因事以分觀之。所謂與其進也。不與其退也。與其潔也。不保其往也。此誠孔子大公無我之盛心。誘人為善之良法。美惡不掩之直道也。宣公十二年。春秋曰。夏六月乙卯。晉荀林父帥師及楚子戰于邲。晉師敗績。公羊傳曰。大夫不敵君。此其稱名氏以敵楚子何。不與晉而與楚子為禮也。蓋楚莊德進行脩。同於諸夏。討陳之賊。不利其土。入鄭皇門。不取其地。既卓然有君子之信。自不得同於夷狄。既不同於夷狄。即是晉侯之匹。故春秋不曰楚而曰楚子。蓋不稱其國而成之為君也。林父人臣。何以序於君上。既序人君之上。則無臣子之禮明矣。不許晉得與楚子為君。

臣之禮所以惡晉也。以晉變而為夷狄也。

二 凡春秋之義不與夷狄之主中國。若中國亦新有夷狄之行則亦不使中國主之。蓋純以禮義為主。若兩無禮義則兩皆不與。不問其為夷為夏也。昭公二十三年秋七月。春秋曰。戊辰吳敗頓胡沈蔡陳許之師于雞父。胡子髡沈子楹滅。獲陳夏齧。公羊傳曰。此偏戰也。曷為以詐戰之辭之。不與夷狄之主中國也。然則曷為不使中國主之。中國亦新夷狄也。蓋中國是時王室亂而莫肯救。故春秋以為夷狄也。

三 凡霸國當保安中國。救諸侯之難。若不能救。反侵伐中國。則春秋狄之。昭公十二年。春秋曰。晉伐鮮虞。何注曰。謂之晉者。中國以無

義故為夷狄所彊。令楚行詐滅陳蔡。諸侯夏懼然去而與晉會于屈銀。不因以大綏諸侯。先之以博愛。而先伐同姓。從親親起。欲以立威行霸。故狄之。

四 凡中國而與夷狄交伐中國。春秋狄之。春秋於楚子伐徐之下。乃書晉伐鮮虞。故穀梁傳釋之曰。其曰晉狄之也。其狄之何也。不正其與夷狄交伐中國。故狄稱之也。蓋徐鮮皆中國也。楚以夷狄而伐徐。晉又以中國而伐鮮虞。是與夷狄交伐中國也。

五 凡諸夏之國。苟不能用中國之禮義。則擯之。戎狄在不足責備之數。故秦本中國。而春秋常夷狄之。文公十二年始有大夫。十八年始錄其君之卒。

六 凡諸夏之國本在中國會盟之內者苟行事有悖中國禮義則因事而夷狄之如魯桓公行惡而邾牟葛三國之君乃於十五年朝事之春秋皆稱人以夷狄之也

七 凡中國而用夷禮則春秋夷狄之如莒本中國末世衰弱遂行夷禮故葬皆稱謚而莒君無謚故成公十四年春秋雖卒莒子朱而不

書其葬穀梁傳注

八 凡諸夏之不如夷狄者抑之使與夷狄同文且序位於夷狄之下如夷狄尚知父死子繼而鄆乃廢其世子以外孫為後是夷狄不如也故春秋於襄公五年戚之會不使鄆得如吳之稱國且抑在吳下也

七 進夷狄

一 凡春秋之法備七等之文以進退夷狄曰州國氏人名字子進之為言一則進之於國際團體一則責之以中國禮義也州不若國國不若氏氏不若人人不若名名不若字字不若子公羊傳莊公十年進至於子而止矣曲禮曰其在東夷北狄西戎南蠻雖大曰子二 凡彊而近中國之夷卒暴責之則恐為害深故當進之以漸莊公十年春秋稱楚為荆從七等之極始也

三 凡夷狄能慕王化脩聘禮受正朔者當進之故莊公二十三年夏春秋曰荆人來聘

四 凡夷狄能慕中國朝賢君春秋進之明當扶勉以禮義也僖公

二十九年春秋曰春介葛盧來以夷狄之君不能乎朝故不言朝然猶稱葛盧之名者進之也

五 凡許夷狄者不一而足蓋夷狄質薄不可猝備禮故以漸進之文公九年春秋曰冬楚子使椒來聘是為楚有大夫進比諸夏之始然椒名而不氏猶未純同中國之禮蓋以漸進之不一度而即使足所以寬其責備也

六 凡夷狄治國有狀能與中國通者以中國之辭言之治國無狀不能與中國通者以其俗辭言之如越人自名於越此其俗辭也春秋即其所以自稱之夷音書之見其不能慕中國也名之曰越此中國之辭也進於諸夏者也公羊傳定公五年

七 凡夷狄有可進之道則於其總名之上加以別稱藉示優異如狄為北方總名乃鄙賤之號若稱曰赤狄則加別稱而進之也公羊傳注定公五年

八 凡夷狄去俗歸義則春秋嘉之稱其爵列諸盟會宣公十五年春秋曰六月癸卯晉師滅赤狄潞氏以潞子嬰兒歸公羊傳曰潞何以稱子潞子之為善也躬足以亡爾雖然君子不可不記也離于夷狄而未能合于中國晉師伐之中國不救狄人不有是以亡也蓋潞子去夷狄之俗致狄人不親愛之而又未能與中國合同禮義相親比故猶繫赤狄而中國不救無輔自阻窮困以亡孔子閔焉故稱子以進之書日以痛之也言以歸者責備賢者之義因其可責而責之

責其不死位也。然而進之者，明其國不當絕。有王者起，當復其路氏以為國也。

九 凡夷狄能常與中國會盟者，進之。故僖公二十年，春秋曰：秋，齊人狄人盟于邢。狄稱人也。

十 凡夷狄助義兵，則進之。昭公五年，楚子會諸侯伐吳，春秋進越稱人是也。

十一 凡夷狄能結日偏戰，其行少進，春秋亦進之。故雞父之戰，吳獲陳夏齧，從中國辭治之。公羊傳：昭公二十三年。

十二 凡夷狄能憂中國，則進之。故僖公十八年，狄伐衛以救齊，春秋書曰：狄人。又定公四年，吳以救蔡之故，及楚戰于柏莒，春秋且稱。

曰吳子蓋亂世稱人太平世稱子也


十三 凡夷狄之君有賢行則進之故春秋不書楚君之卒至宣公十八年秋七月始書曰甲戌楚子旅卒以楚莊王有賢行也公羊何注穀梁傳曰夷狄不卒卒少進也卒而不日日少進也日而不言正不正簡之也

十四 凡夷狄能主會行義則孔子不獨不殊主會之夷並不殊其類所以病中國也昭公四年春秋曰夏楚子蔡侯陳侯鄭伯許男徐子滕子頡子胡子沈子小邾婁子宋世子佐淮夷會于申將興義兵以誅齊慶封也何注曰不殊淮夷者楚子主會行義故君子不殊其類所以順楚而病中國蓋是時中國衰微孔子以為楚夷狄尚能行

義以相榮顯。乃諸夏反不能然。故病之也。

十五 凡春秋夷夏之界最嚴。雖進夷狄。猶有不足之辭。蓋不欲使夷狄之治中國之救中國也。宣公十一年。春秋曰。冬十月。楚人殺陳夏徵舒。丁亥。楚子入陳。穀梁傳曰。入者。內弗受也。日入。惡入者也。何用弗受也。不使夷狄為中國也。夫楚之殺徵舒。春秋與其討有罪也。然以夷狄治中國而討罪。不可以訓。故於此還從弗受常例。若不使得討罪者。然蓋為治也。治亦討也。此之謂不使夷狄為中國也。定公四年。春秋曰。冬十有一月。庚午。蔡侯以吳子及楚人戰于伯舉。楚師敗績。穀梁傳曰。吳其稱子何也。以蔡侯之以之。則舉其貴者也。蔡侯之以之。則其舉貴者何也。吳信中國而攘夷狄。吳進矣。其信中國而

攘夷狄奈何。蔡昭公朝於楚，有美裘，正是日瓦囊求之。昭公不與，為是拘昭公于南郢，數年然後得歸。歸乃用事于漢，曰苟諸侯有欲伐楚者，寡人請為前列焉。楚人聞之而怒，為是興師而伐蔡。蔡請救于吳。子胥曰：「蔡非有罪，楚無道也。君若有憂中國之心，則若此時可矣。為是興師而伐楚，何以不言救也？」救大也。夫以吳之救蔡，春秋至稱子以貴之，又書蔡侯之以，以不滅其救蔡之實，乃仍不言救，不曰吳子救蔡。蔡侯以吳子及楚人戰于伯舉，抑之使不得與中國齊蹤也。此皆孔子不使夷狄治中國，救中國之微意，所謂夷夏之界者也。



卷第二十一卷 盜殺

凡暗殺之事。最為孔子所賤惡。襄公二十九年。春秋曰。闇弑吳子餘祭。闇者。刑人而守門者也。哀公四年。春秋曰。盜殺蔡侯申。盜者。罪人也。謂之闇盜者。不得繫國邑。絕骨肉之屬。離人倫。無名姓號氏於天地之間。至賤乎賤者也。春秋繁露第十。蓋春秋於戰伐皆惡之。而諼詐為尤甚。若暗殺之比於詐戰。則諼中之最諼者也。故春秋不以人類待之。此孔子最惡暗殺之文也。夫戰伐之擾亂平和。人尚可以知見而防備。若暗殺之擾亂平和。直令人防不勝防。備不及備。故孔子本以名為教。而至於闇盜。則降之州國氏人名字子七等之下。所謂不齒於人類也。世有結黨立會。以暗殺為事業。以盜賊為英雄者。聞

孔子之教其亦當知所反矣

昭公二十年春秋曰盜殺衛侯之兄輒盜者齊者豹也齊豹本為衛司寇新奪官耳然作而不義春秋書之為盜所以懲肆也若難艱其身以險危大人而有名章徹攻難之士將奔走之是以春秋書齊豹曰盜使求名而不得所以止暗殺也左傳昭公二十年三十一年吾今謹正告天下曰暗殺之罪甚於戰伐實為人類之公敵萬國之罪人誠有欲維持世界之平和者乎自當本春秋之義以治強盜之法治之矣

凡非其所取而取之謂之盜定公八年春秋書盜竊寶玉大弓是也

穀梁傳

